

四庫全書

經部

欽定四庫全書

經部
欽定禮記義疏卷七十一

詳校官監察御史臣莫瞻菴

給事中臣溫常綬覆勘

總校官庶吉士臣何思鈞

校對官助教臣胡子襄

謄錄監生臣任兆炯

欽定四庫全書

欽定禮記義疏卷七十一

間傳第三十七

正義孔氏穎達曰案鄭目錄云名曰間傳者以其記喪服之間輕重所宜此於別錄屬喪服

存疑吳氏澄曰或曰間當讀為間廁之間此篇總論喪禮哀情之發見非釋經之正傳而廁於喪服之正傳者也故名間傳者

斬衰何以服苴苴惡貌也所以首其內而見諸外也斬
衰貌若苴齊衰貌若梟大功貌若止小功緦麻容貌可
也此哀之發於容體者也

苴七余反見賢遍反齊
音咨衰音催梟思里反

正義鄭氏康成曰有大憂者面必深墨止謂不動於
喜樂之事梟或為似孔氏穎達曰此明居喪外貌
輕重之異苴是黎黑色故為惡貌大功轉輕心無斬
刺故貌不為之變又不為之傾平停不動若止於二
者之間衰因鍛布帶屨亦輕其經色用梟同者自別

表義耳 方氏慤曰苴子麻以之為布凡物精為美
麤為惡故曰苴惡貌也蓋孝子之情在內者既極其
哀則形於外也亦為之不美故斬衰則服苴以表之
故曰所以首其內而見諸外以其所表如此而貌亦
宜如之故曰斬衰貌若苴臬亦苴也蓋謂牡麻耳其
為布稍精於子麻上言斬衰服苴則知齊衰而下服
臬矣且齊衰既以緝而齊其下為義則其服緝之臬
固亦宜矣其服如此貌亦宜如之故曰齊衰貌若臬

以其哀既殺於斬衰故貌不如苴之惡也 馬氏晞

孟曰先王因哀以制禮則禮有隆殺因禮以見哀則
哀有大小凡喪事以哀為主閒傳一篇言哀者六自
斬衰以至總麻輕重等差莫不有當其始也本於哀
其終也成於禮有是哀則不得不行是禮有是禮則
不得不致是哀也然而容體聲音言語動乎內者也
飲食衣服居處在乎外者也內外俱備哀禮相稱之
制可坐而定也 吳氏澄曰儀禮經經斬衰苴經杖齊

衰壯麻經傳曰苴麻有黃者壯麻皐也斬衰服苴謂
衰裳經杖並苴色也苴色蒼黑貌之惡似之首其內
而見諸外謂內有哀情則外有此惡貌也皐無子麻
色亦蒼而黑淺齊衰稍輕於斬衰經不用苴而用皐
若苴若皐貌各如其經之色也止不動也貌活動者
象春之生貌靜止者象秋之殺若止謂有慘戚無歡
忻也容貌謂貌如平常之容小功緦麻之服雖輕然
情之厚者貌亦畧變於常其或不能然而但如平常

之容則情不為厚而亦未至於甚薄喪與其哀不足而禮有餘不若禮不足而哀有餘也云可者微不滿之意容體者謂儀容形體之見諸外者也

案首當讀去聲表出之謂

斬衰之哭若往而不反齊衰之哭若往而反大功之哭三曲而偯小功緦麻哀容可也此哀之發於聲音者也

偯于起反
說文作悠

正義鄭氏康成曰三曲一舉聲而三折也偯聲餘從

容也 孔氏穎達曰小功總麻其情既輕哀聲從容
於理可也 方氏慤曰孝經言喪親曰哭不偯故至
大功始有偯 吳氏澄曰往而不反謂氣絕而不續
往而反謂氣絕而微續三曲而偯謂聲不質直而稍
文也哀容則聲彌文矣

斬衰唯而不對齊衰對而不言大功言而不議小功總
麻議而不及樂此哀之發於言語者也

正義鄭氏康成曰議謂陳說非時事也 孔氏穎達

曰唯而不對但唯於人不以言辭而對也皇氏以為親始死時雜記曰三年之喪對而不問謂在喪稍久故對也大功稍輕得言他事而不議論時事之是非雜記云齊衰之喪言而不語彼謂言言已事為人說為語與此言異也方氏慤曰唯則順之而已對則有可否焉對則應彼而已言則命物焉言則直言而已議則詳其義焉議則主於事而已樂則通其情焉由其哀有輕重故發於言語有詳略也

存疑吳氏澄曰總麻凡事陳說而議但不議及於作樂歡娛之事耳

斬衰三日不食齊衰二日不食大功三不食小功總麻再不食士與斂焉則壹不食故父母之喪既殯食粥朝一溢米莫一溢米齊衰之喪疏食水飲不食菜果大功之喪不食醯醬小功總麻不飲醴酒此哀之發於飲食者也

與音預溢音逸
莫音暮食音嗣

正義王氏肅曰滿手曰溢

案辨詳大記

孔氏穎達曰齊

衰二日不食皇氏云謂正服齊衰也喪大記云三不食當是義服齊衰小功緦麻喪大記云壹不食再不食則一不食謂緦麻再不食謂小功方氏慤曰三不食則日有半也朱氏申曰斬衰既殯則三日矣故可食粥吳氏澄曰五服皆同姓之骨肉哀其死而不食者恩也士乃異姓之朋友與斂其尸而感發哀情亦廢一食者義也喪大記云士之喪士與斂焉則為之一不食

父母之喪既虞卒哭疏食水飲不食菜果期而小祥食菜果又期而大祥食醯醬中月而禫禫而飲醴酒始飲酒者先飲醴酒始食肉者先食乾肉

禫大感反
今本作有醯醬

正義鄭氏康成曰先飲醴酒食乾肉者不忍發御厚味孔氏穎達曰此明父母終喪以來所食之節大祥食醯醬則小祥食菜果之時但用鹽酪也不能食者得用醯醬醴酒味薄乾肉又澁所以先飲食之

吳氏澄曰父母之喪既虞卒哭所食與瘠衰既殯後

同小祥後所食與大功既殯後同大祥後亦與小功既殯後同禫後飲醴酒則漸復常而飲酒食肉矣

父母之喪居倚廬寢苦枕塊不說經帶齋衰之喪居堊室芻藿不納大功之喪寢有席小功總麻牀可也此哀

之發於居處者也

苦始占反塊苦怪反說吐活反芻戶嫁反

正義鄭氏康成曰芻今之蒲草也孔氏穎達曰此明初遭五服之喪居處之異芻蒲草為席藿頭為之不編納其頭而藏於內也

通論孔氏穎達曰斬衰居倚廬齊衰居堊室論其正耳亦有斬衰不居倚廬者則雜記云大夫居廬士居堊室是士服斬衰而居堊室也亦有齊衰之喪不居堊室者喪服小記曰父不為衆子次於外注云自若居寢是也 吳氏澄曰士斬衰不居倚廬乃臣為君服父為衆子齊衰不居堊室乃尊者為卑者服也

父母之喪既虞卒哭柱楣翦屏卒翦不納期而小祥居堊室寢有席又期而大祥居復寢中月而禫禫而牀

音楣

眉

正義孔氏穎達曰此明遭父母喪至終服所居改變之節 方氏慤曰柱廬間之楣以為之固故曰柱楣 翦廬間屏蔽之草而飾之故曰翦屏 陸氏佃曰言翦屏則前此茅茨不翦柱楣於柱置楣而已 彭氏綵曰倚廬釋見大記柱楣翦屏者謂於倚廬柱楣之間翦去其所屏之草稍以泥塗之大記所謂既葬柱楣塗廬不於顯者是也期而小祥居堊室則芟草之

上有席又期而大祥居雖復殯宮寢猶未備牀至大祥後間一月而禫禫始有牀也

通論陸氏佃曰此期而席居堊室喪服傳既虞寢有席既練舍外寢傳所記尊者居喪之法此言大夫士禮而已 吳氏澄曰既虞卒哭芻翦不納則與齊衰初喪同特居廬為異耳小祥後乃得居堊室也小祥後寢有席則與大功初喪同禫後牀乃與小功總麻初喪同也

案此上數節與喪大記喪服小記雜記所載微異蓋古禮既遠傳之者未免各守其師說要其哀戚惻怛之意則無不同也

斬衰三升齊衰四升五升六升大功七升八升九升小功十升十一升十二升總麻十五升去其半有事其縷無事其布曰總此哀之發於衣服者也

去起呂反

正義鄭氏康成曰此齊衰多二等大功小功多一等

孔疏喪服記止云齊衰四升此五升六升多二等喪服記大功八升若九升此多七升一等小功十升若

十一升此多服主於受孔疏以喪服父母為主欲文相值故略而不言案斬衰

既葬當受以齊衰四升既練受以功衰八升也是極列衣服之差也孔氏

穎達曰此明五服精麤之異有事其縵無事其布曰

總者以三月之喪治其麻縵其細如絲故云總麻以

朝服十五升抽去其半縵細而疏也有事其縵謂鍛

治其布縵縵也無事其布謂織布既成不鍛治其布

以哀在外故也方氏慤曰八十一縵為升一服而

升數不同者以其有正服降服義服故也所謂喪多

而服五者此也

通論朱子曰總十五升抽其半者是一篋只用一經
如今廣中疎布又如單經黃草布皆只一經也然小
功十二升則其縷反多於總矣又不知是如何賈

氏公彥曰案喪服上下十有一章從斬至總升數有
異斬衰有二為父以三升為正為君以三升半為義
其冠同六升三年齊衰惟有正服四升冠七升繼母

慈母雖是義服繼母以配父故與因母同

案慈母以重命不敢

降亦與
母同

是以畧為一節有正而已杖期齊衰父在為

母為妻正服齊衰五升冠八升

案雜記云十一月而練十三月而祥十五

月而禫是也然母則恩愛也妻則義合也雖父尊厭屈禫杖猶申故與三年同正服不杖齊衰

期有正有義正則五升冠八升義則六升冠九升齊

衰三月皆義服衰六升冠九升曾祖父母應是正服

但正服合服小功以尊其祖不敢服小功而服齊衰

既非本服故與義服同也殤大功有降有義為夫之

昆弟之長殤義也其衰九升餘皆降也衰七升冠十

升義服衰九升冠十升大功有降有正義姑姊妹出適之等是降婦人為夫族為義餘皆正也其衰八升又總衰唯有義服衰四升半冠七升而已諸侯之大夫為天子故同義服也殤小功有降有義婦人為夫之族類是義衰冠同十二升餘皆降也衰冠同十升成人小功有降衰如殤降有正衰同十一升有義衰同殤義總布之衰冠降正義也皆同十五升之抽去其半而已 又曰吉服所以表德凶服所以表哀德

有高下章有升降哀有深淺布有精麤

存異彭氏綵曰案孔氏說去其半意專指總朱子謂
總十五升抽去其半則小功十二升其縷反多於總
有所不通蓋此去其半之文雖在總麻十五升下其
實斬齊大小功升數俱是去其半斬衰三升抽其半
止百二十縷齊衰四升抽其半止百六十縷以漸至
總十五升抽其半止六百縷凡五服精麤輕重之等
無不順序孔氏所云朝服及今所傳深衣皆十五升

不去半計一千二百縷 程子曰古者八十一縷曰
升斬衰三升則是二百四十三縷於今之布為已細
總麻十五升則是千有二百縷今蓋無有矣

斬衰三升既虞卒哭受以成布六升冠七升為母疏衰
四升受以成布七升冠八升去麻服葛葛帶三重期而
小祥練冠緣緣要經不除男子除乎首婦人除乎帶男
子何為除乎首也婦人何為除乎帶也男子重首婦人
重帶除服者先重者易服者易輕者又期而大祥素縞

麻衣中月而禪禪而織無所不佩

為母之為於偽反重直龍反緣七總反要

一遙反縞古老

反織息康反

正義鄭氏康成曰葛帶三重謂男子也五分去一而

四糾之帶輕既變因為飾也婦人葛經不葛帶

孔疏案少

儀云婦人葛經而麻帶又上檀弓云婦人不葛帶故士虞禮曰婦人既練脫首經不脫帶此謂齊斬婦人帶不變若大功婦人變服亦受葛也易服謂為後喪所變也

孔疏身先有前喪重

今更遭後喪輕欲變易前喪也

婦人重帶帶在下體之上婦人重之

辟男子也其為帶猶五分經去一耳

孔疏以婦人斬衰不變帶以其

重要故也婦人既重其要恐要帶與首經麤細相似故云其帶猶須五分首經去一分耳以首尊於要但婦人辟男子而重要帶爾小記曰除成喪者其祭也朝服縞冠疏

證祥祭之服非素縞麻衣也

此素縞者玉藻所云縞冠素紕既祥

之冠麻衣十五升布深衣也

孔疏證此經素縞麻衣是大祥後所服謂

之麻者純用布無采飾也

孔疏若有采飾則謂之深衣深衣篇所云是也緣以

素則曰長衣聘禮長衣是也緣以布則曰麻衣此麻衣是也

大祥除衰杖黑經白

緯曰織

孔疏戴德變除禮也

舊說織冠者采纓也無所不佩紛

帨之屬如平常也織或作縵

賀氏循曰斬衰既虞

卒哭受以成布六升夫服緣情而制故情降則服輕
既虞哀必有殺是故以細代麤以齊代斬耳若猶斬
之則非所謂殺也若謂以斬衰命章便謂受猶斬者
則疏衰之受復可得猶用疏布乎是以斬衰之名本
生於始死之服以名其喪耳不謂終其日月皆不變
也 孔氏穎達曰此明父母之喪初死至練冠衰升
數之變并明練後除脫之差也成布六升者言三升
四升五升之布縷既麤疏未為成布六升已下其縷

漸細與吉布相參故稱成布葛帶三重者既虞卒哭受服之節要中之帶以葛代麻帶又差小於前喪服傳云五服經帶相差皆五分去一以四分見在作四股糾之積而相重四股則三重既變麻用葛因以為飾也未受服之前麻帶兩股相合此直云葛帶則首經雖葛不三重猶兩股糾之也小祥練冠縗緣者父沒為母與父同也至小祥又以卒哭後冠受其衰而用練易其冠也又練為中衣以縗為領緣也大祥素

縞麻衣者謂二十五月大祥祭此曰除脫則首服素冠以縞紕之身著朝服而為大祥之祭祭後哀情未除更反服微凶之服首著縞冠以素紕之身著十五升麻深衣也知用十五升者案雜記云朝服十五升此大祥之祭既著朝服則大祥之後麻衣麤細當同朝服也大祥之後更間一月而為禫祭二十七月而禫禫而纖者禫祭之時玄冠朝服禫祭既訖而首著纖冠身著素端黃裳以至吉祭身著吉服尋常所服

之物無不佩也 張子曰古者紡績其布當有吉凶
二種若三四升之麤及總總之細或去縷之半或不
事其布或不事其縷不容吉凶二用者皆是特為有
喪者設所謂成布蓋事縷事布供世俗常用成功之
布但未加灰練耳其功尤麤略者為大功差細者為
小功以蜃灰經鍊然後謂之練如此解之則練與成
布義自兩安除首者麻葛重雖大功之喪可易三年
之練冠舉大功之輕則齊衰可知練冠且去之故言

除也 或問縗緣朱子答曰縗今淺絳色小祥以縗為緣一入謂之縗禮有四入之說亦是漸漸加深色耳然古人亦不專把素色為凶蓋古人專用皮弁皮弁純白自今言之則為大凶矣 方氏慤曰疏衰即齊衰也比功布之升為疏故亦謂之疏斬衰又疏矣然不謂疏衰者以斬之義為重而疏不足以名之故也 彭氏綏曰除服先重者即男子先除首婦人先除帶也易服易輕者謂前喪為後喪所變男子得易

要帶婦人得易首經詳見下文 吳氏澄曰此明三年之喪初服至終服受變除之節士卒哭後受服降初服三等受冠冠降初冠一等去麻服葛謂男子去麻首經服葛首經去麻要帶服葛要帶女子唯去麻首經服葛首經要麻帶如初練後男子首除葛經要葛帶不除女子要除麻帶首葛經不除

存疑陸氏佃曰檀弓練衣緇緣言其衣矣今言練冠緇緣著冠亦緇緣也玉藻縞冠素紕言其冠矣今言

素縞麻衣著衣亦素紕也變素紕言素縞則其紕也以縞之素者也先儒謂深衣純之以布曰麻衣非是案麻至十五升布縷皆治即謂之朝服但朝服緇之不緇即謂之麻衣耳詩言麻衣如雪是也

易服者何為易輕者也斬衰之喪既虞卒哭遭齊衰之喪輕者包重者特既練遭大功之喪麻葛重齊衰之喪既虞卒哭遭大功之喪麻葛兼服之斬衰之葛與齊衰之麻同齊衰之葛與大功之麻同大功之葛與小功之

麻同小功之葛與總之麻同麻同則兼服之兼服之服

重者則易輕者也

麻葛重之重直龍反

正義鄭氏康成曰說所以易輕者之義也既虞卒哭

孔疏兼言之謂士庶人若大夫已上則虞受服也

謂齊衰可易斬服之節也

輕者可施於卑服齊衰之麻以包斬衰之葛謂男子

帶婦人經也

孔疏言斬衰受服之時而遭齊衰初喪男子輕要得着齊衰麻帶而兼包斬衰

之葛帶也婦人輕首得着齊衰麻首經而兼包斬衰之葛經也

重者宜主於尊謂男

子之經婦人之帶特其葛不變之也

孔疏言男子重首特留斬衰麻

經婦人重要特
留斬衰要帶也

此言包特者明於卑可兩施

孔疏卑謂男子

卑要婦人卑首兩施謂施於齊
衰又得兼斬衰以其輕卑之也

而尊者不可貳也

孔疏

尊謂男子尊首婦人尊要故止得
尊於重服不可差貳兼服輕也

既練已下言大功

可易斬服之節也斬衰已練男子除經而帶獨存婦

人除帶而經獨存謂之單單獨也遭大功之喪

案此謂成

服男子有麻經

孔疏男子首空著大功麻經

婦人有麻帶

孔疏婦人要空

著大功
麻帶

又皆易其輕者以麻

孔疏男子又以大功麻帶易練之葛帶婦人又

以大功麻經
易練之葛經

謂之重麻既虞卒哭

案此大功受服時

男子帶

其故葛帶

孔疏以大功葛帶輕於練之葛帶

經期之葛經婦人經其

故葛經

孔疏大功葛經輕於練之葛經故皆反練服

帶期之葛帶

孔疏謂與期葛

帶麤細同其實是大功葛帶也

謂之重葛

案鄭注引服問經期之經句謂斬衰既練經帶已除

此時遭大功之喪男經大功之麻經婦帶大功之葛帶其經帶麤細與期同耳非服期之經帶也孔疏自

明鄭注須善會

齊衰之喪已下言大功可易齊衰期服之節

也無猶兩也不言包特而兩言者包特著其義無者

明有經有帶耳

孔疏麻葛無服之者即前文輕者包重者特之義今齊衰既虞卒哭遭大

功之喪易換輕者故麻葛無服之卑者可包尊須特著其尊卑之義於斬衰重服言之無者直云經帶麻

葛蕪有故於齊衰輕服言之

不言重者三年之喪既練或無經

孔疏

男除首經

或無帶

孔疏女除要帶

言重者以明今皆有

孔疏經帶皆有

期

已下固皆有矣兩者有麻有葛耳

孔疏言男子首與要皆有麻葛婦人

然葛者亦特其重麻者亦包其輕也

孔疏後服之麻與前服之葛麤

細同則得服後麻蕪服前葛也

又竟言有上服既虞卒哭遭下服之

差惟大功有變三年既練之服小功已下則於上皆

無易焉

孔疏服問篇小功總不得變大功已上謂成人之喪

此言大功之葛與

小功之麻同小功之葛與總之麻同主為大功之殤

長中言之服重者謂特之也

孔疏服重者前文重者特是也易輕者前文輕

者包是也

則易輕者則男子與婦人也凡下服虞卒哭男

子反其故葛帶婦人反其故葛經其上服除則固自

受以下服之受矣

孔疏男子婦人雖易前服之輕至後服既葬之後還須反服其前喪

故男子反服其故葛帶婦人反服其故葛經經文據其後喪初死得易前喪之輕注意則謂服滿還服前喪輕服也

孔氏穎達曰斬衰齊衰既是重服云包云特

則知齊衰大功亦包特也無服之者男子則大功麻

帶易齊衰之葛帶其首猶服齊衰葛經是首有葛要

有麻故云麻葛無服之據男子也婦人則首服大功之麻經要服齊衰之麻帶上下俱麻不得云麻葛無服之也云麻葛無服但施於男子不包婦人云易輕者男子則易於要婦人則易於首男子婦人俱得易輕也 呂氏大臨曰輕包重特止為斬既虞遭齊衰之喪而立麻葛重止為斬既練遭大功之喪而立麻葛無服則為齊既虞遭大功之喪大功既虞遭小功之喪小功既虞遭總之喪而立麻葛重者其始也以

麻變葛

案雜記有三年之練冠則大功之麻易之惟杖屨不易

麻葛兼服者其

輕者變而兼服之

案問傳麻同則兼服之服問總之麻不變小功之葛小功之麻不變

大功之葛

餘論彭氏絳曰問傳所言易服皆是重喪遭輕喪之禮至於輕喪遭重喪則經文未載今舉一條見例假如初服齊衰之喪又遭斬衰之喪雖除下齊衰冠服別制斬衰冠服雖遇葬母亦服斬衰如遇母虞祔練祥又須著先所除下齊衰冠服俟卒事仍舊著斬衰

服凡先遭輕喪後遭重喪者倣此故喪服小記云父母之喪偕先葬者不虞祔待後事其葬服斬衰孔疏云父母俱喪而猶服斬者從重也雖葬母亦服斬衰若為母虞祔練祥皆齊衰卒事反服重 陳氏澣曰案檀弓云婦人不葛帶者謂斬衰齊衰服帶不變也喪服大功章男女並陳有即葛九月之文是大功婦人亦受葛也又士虞禮餞尸章注云婦人大功小功者葛帶

三年問第三十八

正義孔氏穎達曰案鄭目錄云名曰三年問者善其問以知喪服年月所由此於別錄屬喪服 朱氏申曰三年之喪天下之通喪也故以是名篇

三年之喪何也曰稱情而立文因以飾羣別親疎貴賤之節而弗可損益也故曰無易之道也

稱尺證反下同別彼列反

正義鄭氏康成曰稱情而立文稱人之情輕重而制其禮也羣謂親之黨也無易猶不易也 孔氏穎達

曰此記者假設其問立文謂立禮之節文也飾謂章表也五服之親因三年之喪差降各表其親黨親謂大功以上疏謂小功以下貴謂天子諸侯絕期卿大夫降期以下賤謂士庶人服族其節分明不可損益故曰無易之道引舊語成文也

案此貴賤即親疏中之貴賤孔疏是

陳氏澔曰人不能無群群不能無別立文以飾之則親疏貴賤之等明矣弗可損益者中制不可不及亦不可過是所謂無易之道也治親疏貴賤之節者惟

喪服足以盡其詳服莫重於斬衰時莫久於三年故此篇列言五服之輕重而自重者始 吳氏澄曰此因問三年并及期九月五月三月諸服輕重之差情謂哀情文謂禮文群謂五服之衆人言五服各稱哀情之輕重而立隆殺之禮文因以表飾五服衆人哀戚輕重之情而分別所爲服者之或輕或重與夫服喪者或貴而有絕有降或賤而無降各有品等之節也其親而服重或賤而無降者不可損之而減輕其

疏而服輕或貴而有絕有降者不可益之而加重也
其弗可輕重者乃一定無可改易之理也

通論朱子曰夏商而上大槩只是親親長長之意到
周又添得許多貴貴禮數如始封之君不臣諸父昆
弟封君之子不臣諸父而臣昆弟期之喪天子諸侯
絕大夫降然諸侯大夫尊同則亦不絕不降此皆貴
貴之義上世想皆簡略到周公搜剔出來立為定制
更不可易

創鉅者其日久痛甚者其愈遲三年者稱情而立文所以為至痛極也斬衰苴杖居倚廬食粥寢苦枕塊所以為至痛飾也

創音瘡

正義鄭氏康成曰飾情之章表也 孔氏穎達曰創大則難愈痛甚者喪親傷腎乾肝斬斫之痛既甚故差亦遲立三年之文以表是至痛極者也 吳氏澄曰三年之文斬其衰苴其杖居則在倚廬所食者粥所寢者苦所枕者塊此皆三年喪之外文所以文內

情至痛之表飾也此正答重喪三年之義

三年之喪二十五月而畢哀痛未盡思慕未忘然而服以是斷之者豈不送死有已復生有節也哉

斷丁亂反

正義鄭氏康成曰復生除喪反生者之事也 孔氏

穎達曰人子於此二十五月之時悲哀推痛猶未能

盡憂思悲慕猶未能忘而外貌喪服以是斷割若不

以是裁斷則送死之情何時得已復吉之禮何有限

節 吳氏澄曰此又言重喪雖名三年實則二十五

月蓋二十四月則兩期矣其第二十五月者第三年之月也大祥後除練服去經杖則喪事畢矣其喪後所服至二十七月禫祭畢而除者此非喪之正服也故喪之正服止於二十五月 彭氏綵曰吉服無頓著之理故聖人為是祥服與禫服使之得以從容去凶就吉其實三年之喪二十五月而畢而加此兩月者乃服已殺又能引之使伸於禮在凶與吉之間二十五月者喪之正服也其喪後所服至二十七月者

孝子哀情未忘之餘服也

凡生天地之間者有血氣之屬必有知有知之屬莫不知愛其類今是大鳥獸則失喪其群匹越月踰時焉則必反巡過其故鄉翔回焉鳴號焉蹢躅焉跼蹐焉然後乃能去之小者至於燕雀猶有啁噍之頃焉然後乃能去之故有血氣之屬者莫知於人故人於其親也至死不

窮

喪息浪反號音豪啁張
留反噍子流反知音智

正義鄭氏康成曰匹偶也言燕雀之恩不如大鳥獸

大鳥獸不如人含血氣之類人最有知而恩深也於其五服之親念之至死無止已

將由夫患邪淫之人與則彼朝死而夕忘之然而從之則是曾鳥獸之不若也夫焉能相與羣居而不亂乎

與平

聲曾音層焉
音煙為去聲

正義鄭氏康成曰言惡人薄於恩死則忘之其相與聚處必失禮也 吳氏澄曰患猶病也謂有邪僻淫溺之病

將由夫脩飾之君子與則三年之喪二十五月而畢若駟之過隙然而遂之則是無窮也

過音戈

正義鄭氏康成曰駟之過隙喻疾也遂之謂不時除也孔氏穎達曰駟馬峻疾空隙狹小以峻疾過狹小急速之甚朱氏申曰遂其心之所欲則無除喪之期也

案脩飾謂脩其飾羣之道

故先王焉為之立中制節壹使足以成文理則釋之矣

為去聲

正義鄭氏康成曰立中制節謂服之年月也釋猶除也去也 孔氏穎達曰立中人之制以為年月限節壹謂齊同三年一閏天道小成子生三年免於父母之懷故服以三年成文章義理

案相交曰文各別曰理先王憂邪淫者必忘親脩飾者且滅性故酌人情之中制一定之節使相交足以成文相辨足以成理

然則何以至期也曰至親以期斷

期音基下同
斷丁亂反

正義孔氏穎達曰此明一期可除之節

存疑鄭氏康成曰言三年之義如此則何以有降至
於期也期者謂為人後者父在為母也答言服之正
雖至親皆期而除也 孔氏穎達曰言為父母本應
三年何故為人後者為本生父母及父在為母而止
於期為至親本以期斷故雖為他後及父在為母但
以期也

辨正孔氏穎達曰經意父母本應三年何以至期有
應除之義故答曰至親以期斷是明一期可除之節
故禮期而練男子除經婦人除帶下文云加隆故至
三年是經意不據為人後及父在為母期鄭之此釋
恐未盡經意

是何也曰天地則已易矣四時則已變矣其在天地之
中者莫不更始焉以是象之也

正義鄭氏康成曰法此變易可以期也 孔氏穎達

曰言期時天地之中動植之物無不於前事之終更
為今事之始聖人以人事法象天地故期年也

案此言三年喪既練則首經要帶因時變除有更始
之象焉故親喪降期由此義而起也

然則何以三年也曰加隆焉爾也焉使倍之故再期也
正義鄭氏康成曰言可以期何以乃三年為蓋於父
母加隆其恩使倍期也下焉猶然孔氏穎達曰焉
猶然也言子既加隆於父母故然使倍之

由九月以下何也曰焉使弗及也

正義鄭氏康成曰言使其恩不若父母 孔氏穎達
曰然使恩隆不及於期也五月不及九月三月不及
五月轉相不及也

案此因三年喪而明五服之制不言期上已明也

故三年以為隆總小功以為殺期九月以為間上取象
於天下取法於地中取則於人人之所以羣居和壹之

理盡矣

殺色
界反

正義鄭氏康成曰取象於天地謂法其變易也自三年以至總皆歲時之數也言既象天地又足以盡人聚居純厚之恩也孔氏穎達曰隆謂恩愛隆重殺謂情理殺薄間是隆殺之間三年一閏是三年取象於一閏天地一期物終是一期取象於一周九月象陽數又象三時而物成也五月象五行三月象天地一時而氣變此五服之節皆取法天地也子生三年免於父母之懷故服三年人之一歲情意改變故服

一期九月五月三月之屬亦逐人情而減殺是中取則於人取法天地與人三才並備故能調和羣衆聚居和諧專一義理盡備矣 陳氏澔曰期與大功在隆殺之間故云以為間和以情言謂情無不睦也壹以禮言謂禮無不至也

案此總申上五服之制之義

故三年之喪人道之至文者也夫是之謂至隆

正義鄭氏康成曰言三年之喪喪禮之最盛矣 孔

氏穎達曰此重明三年之義言於人道之中至極文理之盛人恩之至極隆厚也

是百王之所同古今之所壹也未有知其所由來者也
正義鄭氏康成曰不知其所從來喻此三年之喪前世行之久矣 孔氏穎達曰言三年之喪行之自遠不知自何代而來也案易繫辭曰古之葬者厚衣之以薪葬之中野不封不樹喪期無數尚書云百姓如喪考妣三載此云不知所由來者但不知定在何時

唐虞以前喪服與吉服同皆以白布為之故郊特牲云大古冠布齊則緇之若不齊則皆用白布至三代吉凶異也

孔子曰子生三年然後免於父母之懷夫三年之喪天下之達喪也

正義鄭氏康成曰達謂自天子至於庶人 馬氏晞孟曰中庸曰期之喪達乎大夫三年之喪達乎天子父母之喪無貴賤一也然而世衰道微狃於習俗故

雖宰我親受業於孔門猶以期可已為問蓋人情之大不美也禮之所載三年問者宜亦當時之人疑此為重與故曰凡天地之間有血氣之屬大至於鳥獸小至於燕雀莫不知愛其類又況於人乎其曰三年之喪人道之至文百王之所同古今之所壹則為此書者亦有為而作也

欽定禮記義疏卷七十一

欽定四庫全書

欽定禮記義疏卷七十二

深衣第三十九

正義孔氏穎達曰案鄭目錄云名曰深衣者以其
記深衣之制此於別錄屬制度 呂氏大臨曰古
者衣裳殊制所以別上下也惟深衣之制衣連裳
而不殊蓋私燕之服尚簡便也雖曰簡便不可以
無法故有五法之象 方氏懋曰有虞氏深衣而

養老傳曰庶人服短褐深衣則自天子至庶人皆服之也

通論鄭氏康成曰深衣連衣裳而純之以采者素純曰長衣有表則謂之中衣大夫以上祭服之中

衣用素士祭以朝服中衣以布明矣

孔疏天子大夫四命爵弁

自祭故中衣用素天子之士諸侯之大夫亦士也祭以朝服諸侯之士玄端亦衣朝服而裳異朝服用布故中衣亦布

孔氏穎達曰長衣中衣及深衣其制

度同玉藻云長中繼拊尺若深衣則緣而已緣廣

寸半凡深衣皆諸侯大夫士夕時所著之服庶人
吉服亦深衣皆著之在表也朝服祭服有中衣喪
服亦有中衣檀弓練衣黃裏注云練中衣以黃為
內但不得繼拵尺耳喪服儀云帶緣各視其冠注
云緣如深衣之緣下云具父母大父母衣純以纁
以青之屬唯孤子深衣純以素但以緣而已其吉
服中衣亦以采緣諸侯得綃黼為領丹朱為緣大
夫士不用綃黼丹朱但用采純而已其長衣若以

采緣則與吉服中衣同故知以素緣也若以布緣則曰麻衣其喪服之中衣其純用布視冠布之麤細至葬可以用素緣也練則用緇也詩之麻衣則與此別彼謂吉服之衣也所以此稱深衣者以餘服則上衣下裳不相連此深衣衣裳相連被體深邃故謂之深衣 陳氏澂曰朝服祭服喪服皆衣與裳殊惟深衣不殊則其被於體也深邃故名深衣制同而名異者有四焉純之以采曰深衣純之

以素曰長衣純之以布曰麻衣著在朝服祭服之

內曰中衣

古者深衣蓋有制度以應規矩繩權衡短毋見膚長毋

被土續衽鉤邊要縫半下

母音無見同現衽而審反又而鵠反要一遙反

正義鄭氏康成曰聖人制事必有法度毋見膚者衣

取蔽形

孔疏若見膚肉則褻也

毋被土為汙辱也續猶屬也衽

在裳旁者也屬連之不殊裳前後也

孔疏若喪服裳前三幅後四幅

各自為之不相連今深衣裳一旁則連鉤邊若今曲之相著一旁有曲裾連之與相連無異

裾也續或為裕三分要中減一以益下下宜寬也要

或為優

孔疏凡布廣二尺二寸以四寸為縫一尺八寸三分之為六寸減六寸以益下上二幅一

尺二寸下二幅二尺四寸

孔氏穎達曰作記之時深衣無復制

度故稱古者言蓋疑辭衽謂深衣之裳以下闊上狹謂之衽接續此衽而鉤其旁邊要縫謂要中之縫下畔一丈四尺四寸要縫半之七尺二寸容舉足而行故宜寬也 方氏慤曰玉藻謂縫齊倍要以縫齊為倍則要縫為半矣此所以互言之 楊氏簡曰深衣

屬裳則當續衣之衽使之長與裳齊也 呂氏大臨
曰衣之旁幅下殺裳之旁幅上殺上下之衽相續而
中曲 楊氏曰既合縫了又再覆縫合縫為續衽覆
為鉤邊

案深衣之異於禮服者在衣惟一領耳朝祭諸服其
領直故左右二衽皆摺而掩於內以露裼衣至襲則
出其左衽而右揜而裘與裼衣皆不見深衣則其領
方交於兩衽之上先掩左衽於內次掩右衽於外故

曰衽當旁也若裳則與朝祭大異朝祭之裳十二幅
襞積而旁無殺縫深衣止六幅裁為十二幅故此篇
於裳言之最詳蓋朝祭之衣與裳別故衣有垂下之
衽以蔽裳而裳之長短不必言深衣衣與裳連則衣
垂下之衽無所用之故先言短長之無定而即言續
衽言裳與衣相續在垂衽之處故孔氏直言此衽指
裳前後左右皆有衽也既以六幅解為十二幅則每
幅半有邊半無邊無邊則其縷易散而縫之亦不固

故必以有邊者與無邊者相合先以無邊者緝之後以有邊者掩其外而再緝之謂之鉤邊故鄭氏曰衽謂裳幅所交裂也惟後中二片則必以有邊者相合與衣背縫一直而下皆削幅故曰負繩其名衽謂小要者衣之上與袖相屬裳之齊又倍要唯當要處最小也故禮衣有垂下之衽朝祭之衽無考而鄭言若今曲裾孔言朝服曲裾似朝祭下垂之衽亦上殺下廣惟喪服上廣下殺以變於吉若深衣則無此衽而

有當旁之衽玉藻云衽當旁正指深衣之衽本篇續衽則明所以衽當旁之故見此續處即禮服之垂衽處此處不用衽故衽當旁耳而鄭孔多就續處言之諸儒多以朝祭之衽喪服之衽汨之則成禁手矣

袼之高下可以運肘袂之長短反詘之及肘帶下毋厭

髀上毋厭脅當無骨者

袼音各亦作膊詘邱勿反厭於甲反髀畢婢反當丁浪反

正義鄭氏康成曰袼衣袂當腋之縫也肘不能不入袂屬幅於衣詘而至肘當臂中為節臂骨上下各

尺二寸則袂肘以前尺二寸肘或為腕帶當骨緩急
難為中也 孔氏穎達曰格謂當臂之處袂中高下
宜稍寬大可以運動其肘袂二尺二寸肘尺二寸是
容運肘也袂長二尺二寸并緣寸半為長二尺三寸
半除去縫之所殺各一寸餘有二尺一寸半在從肩
至手二尺四寸今二尺一寸半之袂得反詘及肘者
以袂屬於衣幅廣二尺二寸身脊至肩但尺一寸也
從肩覆臂又尺一寸是衣幅之畔覆臂將盡今又屬

袂於衣又二尺一寸半故反詘其袂得及於肘也帶
若當骨則緩急難中故當無骨之處此深衣帶下於
朝祭服之帶也朝祭之帶則近上故玉藻云三分帶
下紳居二焉是自帶而下四尺五寸也 馬氏晞孟
曰服身之章身服之準故視肘以為袂肘尺二寸袂
二尺二寸殺袂以為袪三袪以為要袪尺二寸倍為
二尺四寸三之七尺二寸倍要以縫齊長一丈四尺
四寸也

案凡衣視身之長短有衽有邊有要有下有袼有袂有帶而短長適均纖曲各當此深衣之所以應規矩繩權衡也

制十有二幅以應十有二月袂圜以應規曲袷如矩以應方負繩及踝以應直下齊如權衡以應平

圜圓同袷音劫踝華

上聲齊音咨

正義鄭氏康成曰裳六幅幅分之以為上下之殺袂

圜應規謂胡下也

司馬氏光曰牛領下垂者謂之胡從袖口至袖下裁令勢圓如牛胡

也 案袖根二尺二寸
袂口尺二寸故須裁

袷交領也古者方領

孔疏以漢時領

皆向下交垂故云古者方領似今攤咽

如今小兒衣領

孔疏方折之也司馬氏光曰

漢時小兒衣不可見今小兒疊方幅繫頸下謂之涎衣

繩謂繫

司馬氏光曰繫音督衣之背縫

謂之

與後幅相當之縫也踝跟也齊緝也

孔氏穎

達曰每幅交解為二是十二幅也負繩謂衣之背縫

及裳之背縫上下相當如繩之直非謂實負繩也

陳氏祥道曰十二月者天之數規而圓者天之體矩

應方者地之象直與平者人之道 呂氏大臨曰衣

袂之制有三有侈者自服而侈之袷至袷而侈之朝服以上是也有端者自袷至袷方正而製之玄端素端是也有圜者內殺於袷外殺於袷中則胡下深衣是也欲使行者舉手以為容儀如規之圜也

案自服之服恐

誤或疑是腋字

通論敖氏繼公曰十二幅謂衣六幅裳六幅是也蓋衣身二幅左右袂各二幅是謂衣之六幅裳以六幅布交裂裁之為十二片其實止六幅也衣裳各六幅

象一歲之六陰六陽也

存疑司馬氏光曰鄭注周禮袷狀如著

案此字疑誤

橫銜

之繡潔於項顏師古注漢書繡結礙也潔繞也蓋為結紐而繞項也今朝服有方心曲領以白羅為之方二寸許綴於圓領之上以繫於頸後結之或袷之遺象與而曲禮鄭注袷交領也則領之交會自方疑更無他物且從之以就簡易 葉氏夢得曰袷圓以應規不云領曲以應矩而云曲袷如矩以應方則袷與

領非一物也張華注朱勃事引漢書音義頸下施衿
正方儒者之服則領之外蓋別有衿方折之加於領
上此正古深衣之制若為交領則當在背何抱之云
乎曲禮視不上於衿鄭氏亦以衿為交領衿當在帶
之上所以尊天子若為交領無乃太高乎

案曲衿交領也以右襟之末斜交於左脅以左襟之
末斜交於右脅則領不直垂而方矣溫公及葉氏之
疑似與注不符

故規者行舉手以爲容負繩抱方者以直其政方其義也故易曰坤六二之動直以方也下齊如權衡者以安志而平心也

正義鄭氏康成曰行舉手謂揖讓也引易言深衣之直方應易之文也政或爲正心平志安行乃正或低或仰則心有異志者與孔氏穎達曰所以袂圓中規者欲使行者舉手揖讓以爲容儀如規也負繩背之縫也抱方領之方也以直其正解負繩欲使人直

其政教以方其義解抱方欲使義事方正記者既明
方直之義故引坤卦之六二直方以證之裳下之齊
如權之衡低卽平也 方氏慤曰規矩者方圓之體
方圓者規矩之用自曲袷如矩以應方而下皆上言
體下言用惟袷則上言用下言體蓋袷之圓非其體
然及舉手以爲容則圓爾乃其用然也上言如矩而
後言負繩以衣先後爲序下言負繩而後言抱方以
易直方爲序且應十有二月仰觀於天也直其政方

其義俯察於地也可以運肘近取諸身也應規矩繩權衡遠取諸物也

案易下言君子敬以直內義以方外則上自當作直其敬也方其義也此作直其政乃敬字譌其半今易作直其正又以政字之譌而去其半耳

五法已施故聖人服之故規矩取其無私繩取其直權衡取其平故先王貴之故可以為文可以為武可以擯相可以治軍旅完且弗費善衣之次也

相息
亮反

正義鄭氏康成曰五法已施聖人服之言非法不服

也貴之貴此衣也完且弗費言可苦衣而易有也

孔疏

以其完牢可苦事衣著以白布為深衣者用十五升

布

孔疏與朝服相類知十五升布

鍛濯灰治

孔疏打洗鍛濯用灰治理使和熟也

純之

以采善衣朝祭之服也自士以上深衣為之次

孔疏玉藻

諸侯朝朝服夕深衣大夫朝玄端夕深衣是朝祭之次服庶人吉服深衣而已

孔疏

吉服自深衣以下更無餘服故知庶人同之喪服衰裳上下無差亦知庶人吉服乃深衣也

陳

氏祥道曰文事有爵弁服武事有韋弁服先儒以善

衣爲朝祭之服蓋舉一端明之也深衣異於餘服者
不特衣裳連餘服幅前三後四深衣則十二幅矣餘
服之帶三分帶下紳居二焉深衣之帶則當無骨者
矣方氏慤曰五法皆公必以規矩言無私者方圓
有天地之象其無私尤足道也聖人以德言先王以
位言有德足以稱之故服之有位足以作之故貴之
端冕則有敬色所以爲文介冑則有不可辱之色所
以爲武然端冕不可以爲武介冑不可以爲文兼之

者惟深衣而已然文非若端冕可以視朝臨祭也特可以贊禮而為擯相而已武非若介冑可以臨難折衝也特可以運籌而治軍旅而已制有五法故曰完

案此訓完字與鄭注相備

其實則布其色則白故弗費

通論呂氏大臨曰深衣之用上下不嫌同名吉凶不嫌同制男女不嫌同服諸侯大夫士夕深衣庶人吉服深衣此上下同也有虞氏深衣而養老將軍文子除喪而受越人弔練冠深衣親迎女在塗壻之父母

死深衣縞總以趨喪此吉凶男女同也

具父母大父母衣純以續具父母衣純以青如孤子衣
純以素純袂緣純邊廣各寸半

大音泰緣悅絹反
廣古曠反純音準

正義鄭氏康成曰尊者存以多飾為孝續畫文也三

十以下無父稱孤純謂緣之也緣袂謂其口也

孔疏其

袂口非口
外別有緣

緣緡也

孔疏既夕鄭注在幅曰緡
在下曰緡此謂深衣下緣

緣邊衣

裳之側

孔疏深衣外衿之邊有緣
裳外邊曲裾掩處亦有緣

廣各寸半則表裏

共三寸矣惟袷廣二寸

陸氏朗曰大父母祖父母

也 孔氏穎達曰具父母父母俱在也大父母具亦然若其不具一存一亡不必純以續也有父母而無祖父母故飾少而純以青若無父母惟祖父母在亦當然也 呂氏大臨曰三十以下無父可以稱孤三十以上有為人父之道不言孤也 陳氏祥道曰具父母大父母純以續備五采以為樂也具父母純以青體少陽以致敬也孤子純以素存凶飾以致哀也 小祥純以緇則大祥緣以布吉時夕服緣以采 方

氏慤曰褰口謂之袂裳下謂之緣衣側謂之邊其純皆寸半三五之數也

總論朱子曰深衣裁用細白布度用指尺中指中節為寸衣二幅不裁其長過脇下屬於裳用布二幅中屈而下垂之如今之直領衫但不裁破腋下每幅之下屬裳三幅裳交解十二幅上屬於衣其長及踝用布六幅每幅裁為二幅一頭廣一頭狹狹頭當廣頭之半以狹頭向上而聯其縫以屬於衣每三幅屬衣

一幅圓袂用布二幅各中屈之如衣之長屬於衣之
左右而縫合其下以爲袂其本之廣如衣之長而漸
圓殺之以至袂口則其徑一尺二寸方領兩襟相掩
袂在腋下則兩領之會自方曲裾用布一幅如裳之
長交解裁之疊兩廣頭並令向上布邊不動但稍裁
其內旁大半之下令漸如魚腹末如鳥喙內向而緝
之相沓綴於裳上之右旁以掩裳際右幅在下左幅
在上布邊在外裁處在內

案朱子晚歲所著深衣去
舊說曲裾之制而不用茲

姑存之以
備考耳

衣裳皆緣緣用黑繒具父母以青大父母
以續領表裏各二寸裳下及邊表裏各一寸半皆就
布緣袂口表裏亦一寸半布外接出大帶帶用白繒
廣四寸夾縫之其長圍要而結於前再繚之而為兩
耳及垂其餘為紳下與裳齊以繒緣其紳之兩旁及
下表裏各半寸如緣之色復以五綵絛廣二寸約其
相結處長與紳齊

投壺第四十

正義孔氏穎達曰案鄭目錄云名曰投壺者以其
記主人與客燕飲講論才藝之禮也此於別錄屬
吉禮亦實曲禮之正篇是投壺與射為類此於五
禮宜屬嘉禮也或云宜屬賓禮 司馬氏光曰投
壺細事聖人取之以為禮用諸鄉黨用諸邦國其
故何哉鄭康成曰投壺射之細也君子射以觀德
為其心平體正端一審固然後能中故也夫審度
於此而取中於彼仁道存焉疑畏則疎惰慢則失

義方象焉左右前却過分則差中庸著焉得一失
二成功盡棄戒懼明焉是故投壺可以治心可以
脩身可以為國可以觀人古者壺矢之制揖讓之
容今雖闕焉然其遺風餘象猶可彷彿也 呂氏
大臨曰燕飲有射以樂賓且以習容以講藝也庭
之脩廣或不足以張侯置鵠賓客之衆或不足以
備官比耦則弧矢之事不能行而比禮比樂志正
體直所以觀德者猶在此先王所以不廢也 應

氏鏞曰壺之為器所以實酒而置之席間者也春秋曰尊以魯壺周官曰其朝獻用兩壺禮器曰五獻之尊門內缶門外壺其始必於燕飲之間謀以樂賓或病於不能射也舉席間之器以寄射節焉投壺以為樂猶擊缶以為樂也以所飲之壺寓所投之矢制禮者因為之節文且用樂以宣達其情此投壺所由興也 陳氏澣曰此為大夫士投壺之禮然左傳載晉侯與齊侯燕投壺則諸侯亦有

之

投壺之禮主人奉矢司射奉中使人執壺

奉上聲

正義鄭氏康成曰矢所以投者也中士則鹿中也

孔疏

鄉射記云大夫兕中士鹿中中之形刻木為之狀如兕鹿而伏背上立圓圈以盛算鄭不云兕中畧之也

陳氏祥道曰投壺禮輕於射故但用中之下而已射人奉之者投壺射之類

也其奉之西階上北面

孔疏皆在西階上欲就賓處也

孔氏穎達

曰主人阼階之上西面奉持其矢中謂受算之器鄉射禮司射升自西階階上北面此奉中亦然使人執

壺於司射之西北面惟云使人不言官者以賤畧之也知是大夫士禮者以經云主人請賓是平敵之辭若諸侯則燕禮大射每事云請於公不云主人請賓也非諸侯禮而經云奏狸首者別取燕飲之義其諸侯相燕亦有投壺故左傳云晉侯與齊侯燕投壺然則天子亦有之但古禮亡無以知也 方氏慤曰矢將以授賓故主人奉之中將以待獲故司射奉之壺將以待投故使人執之而已曰使人不必有攸司夫

人而為之可也中必象獸形者以服猛為義因而為
隆殺猶侯用虎豹之屬爾必謂之中者以中為善故
也奉之使司射所投謂之矢皆以是而已

存疑孔氏穎達曰執壺之人賤於司射故在司射之
西以凡行禮統於主人雖俱在西階而當尊東故燕
禮大射宰夫代公為主人與賓俱升西階而主人在
東也

案主人在阼司射等當自西階東從主人於尊東安

得云俱在西階且西階亦不得云當尊東

總論孔氏穎達曰自此至曰辟論燕禮說屢升堂之後主賓請投辭受之節

主人請曰某有枉矢哨壺請以樂賓賓曰子有旨酒嘉穀某既賜矣又重以樂敢辭主人曰枉矢哨壺不足辭也敢固以請賓曰某既賜矣又重以樂敢固辭主人曰枉矢哨壺不足辭也敢固以請賓曰某固辭不得命敢不敬從賓再拜受主人般還曰辟主人阼階上拜送賓

般還曰辟

哨七笑反樂音洛般盤同還旋同辟避同大戴上無某既賜矣句下作某賜旨酒嘉穀

正義鄭氏康成曰燕飲酒既說屨升坐

孔疏燕禮取俎以出卿大

夫皆降賓反入及卿大夫皆說屨升席羞庶羞之後乃云若射知此亦然也若鄉射則在飲酒未旅前以

詢衆庶禮重故早也主人乃請投壺也否則或射所謂燕射也

枉哨不正貌為謙辭

孔疏枉謂曲而不直哨謂哨峻不正

固之言如故

也言如故辭者重辭也不得命不以命見許也賓再

拜受拜受矢也主人既辟進授矢兩楹之間也拜送

送矢也辟亦於其階上 孔氏穎達曰賓既許主人

投壺賓乃於西階上北面再拜遙受矢也主人見賓拜乃般還曲折還謂賓曰今辟而不敢受言此者欲止賓之拜也於是賓及主人皆來兩楹之間相就俱南面主人在東授矢與賓主人復歸阼階上北面拜送矢賓亦歸西階上般還而告主人曰今辟而不敢受亦以止主人拜也鄉飲酒鄉射拜受爵送爵皆北面知此亦當北面 呂氏大臨曰投壺禮有加於射禮者不敢以禮殺而紓吾敬也燕樂而不淫禮殺而

敬不衰此德所以脩交所以久也

存親熊氏安生曰拜時般還或可東西面相拜曰辟者是贊者來辭告主人及賓言曰辟

案鄉射有司請射賓對曰某不能為二三子許諾有司授弓矢無主賓授受拜辟諸文者蓋弓矢主賓自取不必授受也又射禮賈氏公彥疏云投壺因燕而為之此為衆習禮不專為已也蓋鄉射公事投壺情好也君子不以情好而為狎故其辭彌恭其節彌謹

右請投

已拜受矢進即兩楹間退反位揖賓就筵

正義鄭氏康成曰主人既拜送矢又自受矢進即兩楹間者言將有事於此也退乃揖賓即席欲與偕進

明為偶也賓席主人席皆南鄉間相去如射物

孔疏謂

射者所立之處物長三尺闊一尺二寸兩物東西相去容一弓故鄉射記云物長如筈其間容弓距隨長

武注云筈長三尺距隨者物橫畫也

孔氏穎達曰此明賓主受矢就

筵之節主人拜送矢之後主人贊者持矢授主人主

人於阼階受矢既受矢之後來就兩楹間看投壺處
所乃却退反阼階之位西面揖賓令就投壺之筵相
對為位而共投壺也

右就筵

司射進度壺間以二矢半反位設中東面執八算興請
賓曰順投為入比投不釋勝飲不勝者正爵既行請為
勝者立馬一馬從二馬三馬既立請慶多馬請主人亦
如之

度徒洛反比毗志反飲去聲大戴無以二
矢半四字首作請於賓曰投壺之令曰

正義鄭氏康成曰度壺度其所設之處也壺去坐二
矢半則堂上去賓席主人席邪行各七尺也反位西
階上位也設中東面既設中亦實八算於中橫委其
餘於中西執算而立以請賓俟投請猶告也順投矢
本入也比投不拾也勝飲不勝言以能養不能也
正爵所以正禮之爵也或以罰或以慶馬勝算也謂
之馬者若云技藝如此任為將帥乘馬也射投壺皆
所以習武因為樂 孔氏穎達曰此明度壺設算告

賓之法進度壺者司射於西階上執壺之人處受壺
乃東向來賓主筵前進量度其壺置於賓主筵南也
投壺日中於室日晚於堂大晚於庭各隨光明故也
矢有長短隨地廣狹而度壺皆使去賓主之席二矢
半也室中去席五尺堂上去席七尺庭中去席九尺
司射度壺既畢更還西階上位取中稍進東面而設
中也於中西東面手執八算而興起其中裏亦實八
算矢有本末投矢於壺以矢本入者乃名為入為之

釋算若矢以末入則不名為入不為之釋算比頻也
賓主投壺要更遞而投不得以既入喜悅而已頻投
頻投雖入亦不為之釋算也正爵此謂罰爵然慶罰
皆正禮也既行謂正爵竟也立馬謂取算以為馬表
勝數也每一勝輒立一馬禮以三為成但勝偶未必
得三得二即徹取劣偶之一以足勝偶之二為三故
云一馬從二馬定本無此一句三馬既立請慶多馬
者其勝已成又酌酒慶賀多馬之偶也云亦如之者

司射請賓之黨每事必應曰諾既竟則司射又悉以告主人主人應諾亦悉如賓也 呂氏大臨曰矢本入則本末之序正左右拾投則賓主之儀答不如是不釋算所以責審固詳節文所以觀人之德不尚於苟中也 方氏慤曰凡射人各四矢四矢則四算投壺亦如之賓與主則八算矣故此言執八算也數成於三故三馬既立請慶多馬

通論孔氏穎達曰案鄉射禮三耦先射賓主乃射以

射禮重也此投壺不立三耦以投壺禮輕故也

案射禮主人為下射賓為上射然則此亦賓黨為上
投主黨為下投矣

存異陸氏佃曰比投引手就壺使入後世投壺坐欲

四縣恐其比入也

案比投與拾投
相反陸說非

方氏慤曰算與

馬一也方其執之謂之算以計多少為義及其釋之

謂之馬以勝敵為義姚氏舜牧曰投壺與射皆三

番而止每番勝則立一馬若將所執八算立一馬則

止七算在手立二馬則止六算在手萬一賓主皆中
止釋六算乎愚以算自是算馬自是馬

案算言釋馬言立下言馬各直其算則算非馬可知
特無以考其形制之詳耳漢人格法有功馬散馬皆
刺馬象而植之晉人掘地得玉馬或以為此即投壺
所立之馬也若姚氏慮以算為馬將不足於釋則更
誤儀禮鄉射記箭籌八十注籌算也八十畧以十耦
為正也故一耦射則實八算於中是算之全數有八

十臨射則計耦而供之如四耦則供三十二算三耦則供二十四算也豈止八算而已乎

右請賓

案此投壺定法而司射以告賓主之辭吳氏澄分設壺設中為一節請賓請主為一節

命弦者曰請奏狸首間若一大師曰諾

間間廁之間又去聲大音泰

正義鄭氏康成曰弦鼓瑟者

孔疏鄭知鼓瑟者約鄉射禮用瑟也案下有魯

鼓薛鼓節亦有鼓以弦為重故特云命弦者

狸首詩篇名今逸射義所云

曾孫侯氏是也

案射義狸首詩曰曾孫侯氏四正具舉大夫君子凡以庶士小大莫處御

于君所以燕以射則燕則舉

間若一者投壺當以為志取節焉

孔疏

間若一謂前後樂節中間疏數如一也投壺者當聽之以為志取投合於樂節也

孔氏穎

達曰此明司射命工作樂節投壺之儀諾承領之辭

呂氏大臨曰狸首之詩言賓主以禮相會也猶瓠

葉兔首不敢以微薄廢禮而忘驩也賓主之驩於是

乎交非特諸侯之事故卿大夫士亦得用也 方氏

慤曰以弦歌狸首故命弦者奏之間者樂之節欲其

終始相協故曰若一

通論孔氏穎達曰案鄉射三番初一番耦射不釋算
第二番釋算未作樂第三番乃用樂今投壺發初即
用樂者以投壺禮輕主於歡樂故也非諸侯投壺而
奏貍首者義取燕飲之儀猶鄉射奏騶虞不計人之
尊卑也陸氏佃曰鄭氏謂弦鼓瑟者也鄉飲酒記
曰工四人二人瑟瑟先鄉射蓋亦命弦者變言大師
重鄉射也

存疑陸氏佃曰間若一言或間亦或一也間若間歌一歌一奏間一無間焉以為樂也非以為節也

案間字作中間之間孔疏甚明陸氏解為間歌之間非也投壺或於室或於堂於庭時有堂上堂下異樂乎亦迂矣

右作樂

案此亦司射命樂工之辭朱子以後魯鼓薛鼓繫此下故云然其歌與鼓以為投節也

左右告矢具請拾投有入者則司射坐而釋一算焉賓

黨於右主黨於左

拾音涉

正義鄭氏康成曰拾更也告矢具請更投者司射也

司射東面立釋算則坐以南為右北為左也

孔疏右謂司射

之前稍南左謂司射之前稍北

已投者退各反其位

孔疏反位謂主黨於東賓黨於

西也鄉射禮射畢各反其位則知投壺畢亦各反其位辟後來也

孔氏穎達曰此

論投壺中者釋算之儀左謂主人右謂賓客司射告

主與賓以矢具也請拾投者司射又請賓主更遞而

投也若矢入壺則司射乃坐釋一算於地 方氏慤
曰拾者更也與曲禮言拾級喪禮言拾踊同義賓黨
於右主黨於左者主人尊賓故也凡言左右以右為
尊 陳氏澂曰主賓席皆南鄉主居左賓居右

案此一節正投之事賓主投畢則賓主之黨繼投其
釋算亦各從其黨或謂算釋於中孔云釋於地誤攷
鄉射禮釋獲者執中一人執算從之釋獲者坐設中
受算坐實八算於中橫委其餘於中西南射中則釋

一算於地賓主射畢有餘算則反委之仍於中西南
又改實八算於中以待繼射者是算先實於中後釋
於地孔不誤也

卒投司射執算曰左右卒投請數二算為純一純以取
一算為奇遂以奇算告曰某賢於某若干純奇則曰奇

鈞則曰左右鈞

數色主反純音全奇居衣反大
戴作有勝則司射以其算告

正義鄭氏康成曰卒已也賓主之黨畢已投司射又
請數其所釋左右算如數射算一純以取實於左手

十純則縮而委之每委異之有餘則橫諸純下一算
為奇奇則縮諸純下兼斂左算實於左手一純以委
十則異之其他如右獲畢則司射執奇算以告於賓
與主人也

孔疏皆鄉射禮文

若告云某賢於某者未斥主黨

勝與賓黨勝與以勝為賢尚技藝也鈞猶等也等則
左右手各執一算以告 孔氏穎達曰此明投壺算
數之儀司射於壺西東面執算請也純全也二算合
為一全一純則別而取之一算謂不滿純者奇隻也

遂以奇算告者奇餘也謂左右數鈞等之餘算或左或右不定故稱某賢賢為勝者也勝者若有雙數則云若干純假令十算則云五純也鈞猶等也等則左右各執一算以告司射東面則東西為縮每十雙則東西縮為一委每有十雙更別委之故曰每委異之有餘謂不滿十雙或八雙九雙以下則橫於十純之西南北置之若惟有一算則縮之零純之下在零純之西東西置之此數右算之法若數左算則總斂地

之算實於左手每一純取以委地滿十則異之謂滿十純則總為一委其他所縱所橫如右獲也 方氏慤曰干猶枚也與服衣若干尺之干同

存疑孔氏穎達曰若有奇數則曰奇假令九數則曰九奇也

辨正朱子曰孔疏勝於儀禮賈疏然恐是九算則曰四純一奇

右請投視算

案吳氏澄分拾投釋算為一節卒投數算為一節

命酌曰請行觴酌者曰諾當飲者皆跪奉觴曰賜灌勝

者跪曰敬養

奉芳勇反養羊尚反大戴首作司射舉手曰勝者之弟子為不勝者酌諾下有已酌

皆請舉酒六字

正義鄭氏康成曰司射又請於賓與主人以行正爵

酌者勝黨之弟子升酌奠於豐上不勝者坐取乃退

而跪飲之

孔疏據鄉射禮文

灌猶飲也言賜灌者服而為尊

敬辭也周禮曰以灌賓客賜灌敬養各與其偶於西階上如飲射爵孔氏穎達曰此明飲不勝之儀司射命此酌酒者曰敬以請賓與主人行觴謂罰爵之事賓主已許汝當酌之勝黨弟子受領許酌乃於西階上南面設豐洗解升酌坐奠於豐上勝者與不勝者俱升西階勝者在東不勝者跪取豐上之爵手奉其觴曰蒙賜灌勝者跪執之曰敬以此觴而養不能也鄉射禮弟子奉豐升設於西楹之西勝者之弟子

洗觶升酌南面坐奠於豐上是也 呂氏大臨曰勝
飲不勝者以能養不能也君使士射不能則辭以疾
射者男子之事故以不能者為病病必有養當飲者
跪奉觴曰賜灌勝者跪曰敬養酒者所以養病也能
者不敢以勝驕人爭求勝而辭養也不能者知不勝
為已病不敢以已有病而辭養也 馬氏晞孟曰奉
觴曰賜灌受之以禮而不怨勝者跪曰敬養獻之以
禮而不矜

右卒投飲不勝者

正爵既行請立馬馬各直其算一馬從二馬以慶慶禮
曰三馬既備請慶多馬賓主皆曰諾正爵既行請徹馬

大戴首有司正曰三字
又請下有為勝者三字

正義鄭氏康成曰飲不勝者畢司射又請為勝者立
馬當其所釋算時也三立馬者投壺如射亦三而止
也三者一黨不得三勝其一勝者并其馬於再勝者
以慶之明一勝不得慶也飲慶爵者偶親酌不使弟

子無豐

孔疏飲不勝之時賤其無能故不親酌今既尊賢當須親酌手自授之也

請徹馬

投壺禮畢可以去其勝算也既徹馬無算爵乃行

孔氏穎達曰此明立馬以表賢能之事正爵謂正禮罰酒之爵既行飲畢之後司射請為勝者樹標其馬直當也謂所立之馬各當其初釋算之前所釋之算當中之西也賓主或兩勝或一勝即以少足益於多助勝者為榮以慶賀多馬馬氏晞孟曰立馬以表其勝徹馬以掩其不勝則投壺一用而禮義為備也

應氏鏞曰勝者豈能全勝將有缺而不足之算不勝者間有所得必有棄而不錄之算取不勝者不用之馬而補勝黨未足之算則零算不遺而勝算有助所以成人之美所以遜己之能以與人也

通論孔氏穎達曰案鄉射禮初番三耦射但唱獲而已未釋算亦未飲不勝者第二番耦射畢賓主之黨皆射畢乃釋算飲不勝者第三番三耦及賓主等皆射中鼓節乃釋算飲卒觶今投壺初則不立三耦惟

賓主三番而止

案三番左右鈞則皆無立馬行爵者然適鈞者最少故不言且禮以樂賓或即行相慶禮也

右三投慶多馬

案吳氏澄以上罰爵為一節此分立馬慶爵徹馬為三節以上投壺禮之正經

算多少視其坐籌室中五扶堂上七扶庭中九扶算長尺二寸壺頸脩七寸腹脩五寸口徑二寸半容斗五升

壺中實小豆焉為其矢之躍而出也壺去席二矢半矢

以柘若棘毋去其皮

大戴其坐下有既算周則復始句其皮下有六七分三字

正義鄭氏康成曰算用當視坐投壺者之衆寡為數

也投壺者人四矢亦人四算籌矢也鋪四指曰扶一

指案寸春秋傳曰膚寸而合

孔疏引公羊傳文證膚與扶同

投壺者

或於室或於堂或於庭其禮褻隨晏早之宜無常處

算長尺二寸其節三扶可也或曰算長尺有握握數

也脩長也實以小豆取其滑且堅矢以柘棘取其堅

且重也舊說矢大七分或以棘取無節 孔氏穎達
曰此明算及矢長短多少并壺之大小及矢之所用
以儀禮準之此亦正篇之意算之多少視其所坐之
人每人四矢四算也 呂氏大臨曰五扶七扶九扶
其多少之數以廣狹為之差皆陽數也壺頸脩七寸
腹脩五寸口徑二寸半容斗五升壺去席二矢半亦
陽數也算長尺二寸天數也君子之所法象必本諸
天求諸陽因節文而託其義雖小事有所不廢也

方氏慤曰謂之籌者以計多少為義謂之矢者以觀中否為義算長尺二寸者欲其有別於矢故加二寸焉

通論陳氏祥道曰先王制禮未嘗無所因焉故室中必用几而因几以度室堂上必用筵而因筵以度堂野外必用步而因步以度野投壺用指而已故因指以度籌

存疑鄭氏康成曰腹容斗五升三分益一則為二斗

孔疏以斗五升故加三
分益一從整數計之
得圜困之象積三百二十四

寸也以腹脩五寸約之所得求其圜周圜周二尺七寸有奇是為腹徑九寸有餘也

辨正朱子曰經言所容止於斗有五升而注乃以二斗釋之經言圜壺之實數注乃借方體言之算法所謂虛加之數也蓋壺為圜形斗五升為奇數皆繁曲而難計故算者之術必先借方形虛加整數以定其法然後四分去一以得圜形之實此鄭氏所以舍斗

五升之經文而直以二斗為說也然其言知借而不知還知加而不知減乃於下文遂并方體之所虛加以為實數又皆必取全寸不計分釐定為圓壺腹徑九寸而圍二尺七寸則為失之疏家雖知其失而依違其間是以讀者不能無疑今以算法求之此言二斗之量者計其積實當為三百二十四寸而以其高五寸者分之則每高一寸為廣六十四寸八分此六十四寸者為正方又取其八分者割裂而加於正方

之外則四面各得二釐五毫之數乃復合此六十四寸八分者五為一方壺則其高五寸其廣八寸五釐而外方三尺二寸二分中受二斗如注之初說矣然此方形者算術所借以為虛加之數爾若欲得圜壺之實數則當就此方形規而圜之去其四角虛加之數四分之一使六十四寸八分者但為四十八寸六分三百二十四寸者但為二百四十三寸則壺腹之高雖不減於五寸其廣雖不減於八寸五釐而其圜

則僅為二尺四寸一分五釐其中所受僅為斗有五升如經之云無不諧會矣

魯令弟子辭曰毋懶母教母偕立母踰言偕立踰言有常爵薛令弟子辭曰毋懶母教母偕立母踰言若是者

浮

懶音呼教去聲
懶大戴作荒

正義鄭氏康成曰弟子賓黨主黨年穉者也為其立堂下相褻慢司射戒令之謂魯薛者禮衰乖異不知孰是也懶教慢也偕立不正向前也踰言遠談語也

常爵常所以罰人之爵也浮亦謂是也晏子春秋曰

酌者奉觴而進曰君令浮晏子時以罰梁丘據

孔疏引以

證浮是罰爵之義
小爾雅云浮罰也

浮或作匏或作符踰或為遙 孔

氏穎達曰此一篇是周公正經而有魯薛之事者記

者以周衰之後魯與薛有當時投壺號令弟子之異

未知孰是故因以記之浮罰之爵薛令弟子異於魯

其意則同 呂氏大臨曰飲晏之間易狎童子之心

易流令之所以飭其敬不令而責之敬則近於暴故

令之而後浮 方氏慤曰前曰正爵此曰常爵何也以禮言則曰正以法言則曰常前兼於慶故以禮言之此主於罰故以法言之

存疑陸氏佃曰魯同姓之親也薛異姓之親也記魯令著所以待同姓之禮如此故曰有常爵記薛令著所以待異姓之禮如此故曰若是者浮蓋曰若是者浮則辭有不婉矣

案大戴禮投壺篇與此篇小異不知孰為周初本文

蓋記者各以意脩潤也

司射庭長及冠士立者皆屬賓黨樂人及使者童子皆

屬主黨

大戴上有堂下司正四字下有降揖句見後注疏此節在盡用之為射禮下今從陳氏澔本

正義鄭氏康成曰庭長司正也

孔疏案鄉飲酒將旅之時使相為司正察

飲酒不如儀者故知庭長司正也

使者主人所使薦羞者樂人國子

能為樂者

孔疏以國子習樂故云國子能為樂者明此樂人非瞽矇眡矚之徒以其能與主人

之黨而此皆與於投壺孔氏穎達曰冠士者謂外

觀禮也
人來觀投壺成人加冠之士尊之故令屬賓黨若童

子賤則屬主黨也 陳氏祥道曰主人以仁接賓則
樂人樂賓者也使者及童子事人者也故屬主黨司
射作人者也庭長正人者也冠士行禮者也立者觀
禮者也故屬賓黨壺以授矢致樂者也故主黨執之
中以盛算取勝者也故賓黨奉之然黨雖有賓主之
辨而主黨之樂人必位於西階之上使人執壺亦立
於司射之側凡皆所以就賓又曰侍射則約矢侍投
則擁矢是投壺與射禮無異特繁簡不同爾

後無列之圜者擊鼙方者擊鼓古者舉事鼓各有節
聞其節則知其事矣投壺之鼓半射節者投壺射之
細也射謂燕射 孔氏穎達曰每一圜點則一擊鼙
每一方點則一擊鼓頻有圜點則頻擊鼙頻有方點
則頻擊鼓此射與投壺相對用半鼓節為投壺用全
鼓節為射禮投壺在室在堂是燕樂之事故知此射
亦謂燕射非謂大射及鄉射也 方氏慤曰魯薛之
鼓既異而傳之者又異故記者兩存之 陳氏祥道

曰魯薛所令之辭所制之鼓雖見於經其詳不可得知也觀春秋齊晉之君以此行燕禮為會同之主於其中否以下興衰其重投壺之禮如此則魯薛之詳亦不是過也

存疑陸氏佃曰魯投壺之鼓多薛投壺之鼓少亦所以待同姓異姓之別也詩曰在宗載考有是哉

案魯薛鼓各有二者前為初投之節後為再投三投之節也鼓以君樂五聲不得和升歌下管間歌合

樂無不用鼓者故魯鼓薛鼓總以鼓名之也

案以上投壺禮之記

朱子分五節
各次本經下

大戴記降揖

其阼階及樂作皆與射同節 少儀記侍投則擁

矢勝則洗而以請客亦如之不角不擢馬

朱子并
採入記

故附
存之

儒行第四十一

行下
孟反

正義孔氏穎達曰案鄭目錄云名曰儒行者以其
記有道德者所行也此於別錄屬通論 又曰孔

子說儒凡十七條上十五條皆言賢人之儒第十
六條明聖人之儒十七條之儒是夫子自謂也

呂氏大臨曰儒者之行一出於義理皆吾性分所
當為非以自多求勝於天下也此篇之說有矜大
勝人之氣少雍容深厚之風有道者不為也謂孔
子言之殊可疑然其言不合於理義者殊寡學者
果踐其言亦不愧於為儒矣此先儒所以存於篇
也與

魯哀公問於孔子曰夫子之服其儒服與孔子對曰丘少居魯衣逢掖之衣長居宋冠章甫之冠丘聞之也君子之學也博其服也鄉丘不知儒服

與平聲少詩照反上衣去聲長丁丈

反上冠去聲

正義鄭氏康成曰哀公館孔子見其服與士大夫異

又與庶人不同疑為儒服而問之逢猶大也

孔疏詩維柞之

枝其葉逢逢盛大貌

大掖之衣

孔疏大掖肘掖之寬

大袂禪衣也此君子

有道藝者所衣也孔子生魯長而之宋而冠焉宋其

祖所出也衣少所居之服冠長所居之冠是之謂鄉

言不知儒服非哀公意不在於儒乃今問其服

孔疏末言

不敢以儒為戲是此時意欲戲孔子

庶人禪衣袂二尺二寸袪尺二寸

呂氏大臨曰少居魯則衣魯衣長居宋則冠宋冠

因其俗而已故曰其服也鄉 又曰古衣服之制上

下皆有等差末世僭亂上下無別儒者獨守法度故

人以儒服目之 方氏慤曰逢掖之衣王肅以為深

衣是矣公西赤掌孔子之喪用章甫之冠則孔子之

冠衣固如是也君子之學也博無狹其所居也其服也鄉不忘其所本也晏氏光曰君子恥服其服而無其行能博學則有其德以成德為行然後可稱其服也

通論孔氏穎達曰案曲禮云去國三世惟興之日從新國之法孔子曾祖防叔防叔生木金木金生伯夏伯夏生梁紇梁紇生孔子防叔奔魯至孔子五世應從魯冠而猶著殷章甫冠者以立為制法之主故孔

子於人所行之事多殷禮不與尋常同也

存穀孔氏穎達曰大夫以上侈袂袂三尺三寸袪尺八寸朝祭之服表裏不禪庶人無朝祭事故禪今孔子禪與庶人同袂大與庶人異故公怪之

案大掖之衣是宋國之制如此如疏說似孔子有心以示異矣大夫侈袂說本周官注然不見所據

哀公曰敢問儒行孔子對曰遽數之不能終其物悉數之乃留更僕未可終也哀公命席孔子侍

行去聲篇內並同數色主

反

正義鄭氏康成曰物事也僕太僕君燕朝則正位掌

擯相更之者為久將倦使之相代命席為孔子布席

於堂與之坐也君適其臣升自阼階所在如主

案君適其

臣語似公就孔子者據疏云時孔子自衛新還哀公館之故鄭說如此

孔氏穎達曰

言儒行深遠急說則不能盡其事若細說則太久僕

侍疲倦宜更代之未可盡也晏氏光曰以禮嚴分

則君坐而臣立以道忘分則坐而論道哀公與孔子

論儒行是坐而論道故命席而孔子侍坐焉

曰儒有席上之珍以待聘夙夜強學以待問懷忠信以待舉力行以待取其自立有如此者

正義鄭氏康成曰懷忠信之德以待見舉用也取進

取位也

孔疏進取榮位案取謂上取之我自立其德而君自來聘之問之舉之取之所謂待賈

也者孔氏穎達曰此論儒者脩己立身之事盧氏植

云儒是坐席之珍可重

晏氏曰君子比德於玉故稱珍焉徐氏師曾曰席珍喻

詞言人身之有德猶席上之有珍也

呂氏大臨曰席上之珍自貴而

待賈者也德之可貴人必禮之學之博者人必問之
忠信可任人必舉之力行可使人必取之 陸氏佃

曰席上之珍若伊尹樂堯舜之道於猷畝之中是已

方氏慤曰忠信非由外鑠也故言懷忠信力行在
我之事舉取在彼之事也 晏氏光曰藏器於身則

玉韞於匱中及其待時而動則珍陳於席上夙在日
出之前於此而學是先衆人而有作夜在日入之後
於此而學是後衆人而未息也席上之珍其德可貴

夙夜強學其道可尊二者有師道焉故曰待聘待問
懷忠信其言有物力行其行有常二者有臣道焉故
云待舉待取君子未嘗屈道以伸身必待彼之聘問
舉取然後徐起而應之

存疑鄭氏康成曰席陳也

孔疏猶鋪陳也

珍善也鋪陳往古

堯舜之善道以待聘召

案鋪陳待聘似有銜玉求售之意鄭說未協

儒有衣冠中動作慎其大讓如慢小讓如偽大則如威

小則如愧其難進而易退也粥粥若無能也其容貌有

如此者

易以鼓反下同粥音燭

正義鄭氏康成曰中中間謂不嚴厲也

孔疏在常人中不自異也

張子曰中去聲謂中於禮猶正也

案三說皆通並與下呂氏說相足

如慢如

偽言之不怙怙也

孔疏怙怙急切之意

如威如愧如有所畏

孔氏穎達曰此明儒者容貌之事人以大物與己已

讓此大物辭貌寬緩如傲慢然讓小物如似詐偽亦

謂寬緩不急切言儒不以利動也行大事時形貌似

有畏懼行小事時如有慙愧皆謂重慎自貶損粥粥是柔弱專愚之貌 張子曰大讓如讓國讓天下誠心而讓其貌若不屑也若夫飲食辭辟之間是小讓也如偽為之以為儀爾 呂氏大臨曰辭其大者若自尊然非自尊也尊道也辭其小者若矯飾然非矯飾也欲由禮也由尊道而不屈於世若有所威由禮而不犯非禮若有所愧此儒者所以貴於天下也衣冠中不異於衆不流於俗而已動作慎非禮勿履而

已 方氏慤曰三揖而後進故曰難進一辭而遂退
故曰易退粥粥者柔弱之狀若無能也是皆禮之所
脩道之所與也

存疑陸氏佃曰大則小則猶言大讓小讓讀如敬慎
威儀唯民之則之則 吳氏澄曰則謂守法不踰閑
也於事之大者如有所畏而不敢為於事之小者如
有所恥而不肯為

案容貌德之符故從衣冠動作間想其辭讓中節處

而平日審取舍守義命之學問在其中

儒有居處齊難其坐起恭敬言必先信行必中正道塗
不爭險易之利冬夏不爭陰陽之和愛其死以有待也
養其身以有為也其備豫有如此者

齊側皆反難乃旦
反行去聲先信家

語作
誠信

正義鄭氏康成曰齊難齊莊可畏難也行不爭道止
不選處所以遠鬪訟 孔氏穎達曰塗路也君子行
道路不與人爭平易之地而避險阻以利己冬溫夏

涼是陰陽之和處此世人所競唯儒者讓而不爭也
愛死非解不爭也愛死以待明時養身為行道德

張子曰難者恭慎也書其難其慎言必先信思可信
然後言 陸氏佃曰難猶戒也洗心曰齊防患曰難

方氏慤曰居處齊難則人斯齊難之坐起恭敬則
人斯恭敬之言先信則人斯取信矣行中正則人斯
中正矣以至不爭其利故人資其利不爭其和故人
飲其和愛其死故足以有待養其身故足以有為若

是則非有待物之備先物之豫固不足以致此

通論呂氏大臨曰仲弓問仁孔子教以敬恕此居處
四句敬也道塗二句恕也唯敬與恕則忿懣慾窒身
立德充可以當天下之變而不避任天下之重而不
辭

儒有不寶金玉而忠信以為寶不祈土地立義以為土
地不祈多積多文以為富難得而易祿也易祿而難畜
也非時不見不亦難得乎非義不合不亦難畜乎先勞

而後祿不亦易祿乎其近人有如此者

積子賜反易以
豉反畜許六反

見賢徧反立義家語作
仁義近人下有情字

正義鄭氏康成曰祈求也立義以為土地以義自居也難畜難以非義久留也勞猶事也積或為貨孔氏穎達曰此明儒者懷忠信與義之事儒懷忠信而與人交不貪金玉而與人競人則親而近之積積聚財物也非道之世則不仕是難得也先事後食是易祿也無義則去是難畜也非時謂非明時其親近於

人如此 呂氏大臨曰志非不欲行也時止則止時行則行不可必其見也道非不欲合也非其義也一介不以取諸人不可必其合也難得難畜主於義以自貴然時而行義而合勞而食未始遠於人而自異也 彭氏曰難得指未仕時易祿難畜指既仕時 黃氏乾行曰寶忠信存心也立義行己也多文學問也

案得難則祿之必難而祿養之又易祿易則畜之必

易而久畜之又難觀其難得難畜似遠人而觀其易
祿正自近人孔子有見行可之仕際可之仕公養之
仕又嘗曰吾非斯人之徒與而誰與則其難得難畜
亦原非遠人故曰近人有如此者

儒有委之以貨財淹之以樂好見利不虧其義劫之以
衆沮之以兵見死不更其守鷙蟲攫搏不程勇者引重
鼎不程其力往者不悔來者不豫過言不再流言不極
不斷其威不習其謀其特立有如此者

淹衣蘆反樂五
孝反好呼報反

沮在呂反更平聲驚音至攖俱縛
反斷直卯反勇者家語作其勇

正義鄭氏康成曰淹謂浸漬之劫劫脅也沮謂恐怖

之驚蟲猛鳥猛獸也字從鳥驚省聲也

孔疏蟲鳥獸通名獸摯字

從執下著手鳥驚字從執下著鳥今一驚字而包兩義故曰省聲

以脚取謂之攖以

翼擊謂之搏程猶量也重鼎大鼎也不再猶不更也

不極不問所從出也不斷其威常可畏也不習其謀

口及則言不豫其說而順也孔氏穎達曰此明特

立不羣之事人或以貨財委之以愛樂玩好浸漬之

儒者雖見此利不虧損己之義事苟且而愛也人或脅之以軍衆沮之以兵刃儒者雖見劫見沮以致於死終不改其所守之志而苟從之免死也有愆過之言不再為之聞流傳之言不窮其根本聞之則解也斷絕也不絕其威嚴容止常可畏也逢事則謀不豫習也 呂氏大臨曰鷙蟲攫搏不程其勇者自反而縮千萬人吾往也引重鼎不程其力者仁之為器重舉者莫能勝也其自任也不知其力之不足也過言

不再知之未嘗復行也 方氏慤曰不程勇以況儒者勇足以犯難而無所顧也不程其力以況儒者材足以任事而有所勝也往者不悔非有所吝而不改也為其動足以當理而未嘗悔來者不豫非有所忽而不防也為其機足以應變而不必豫爾過言不免乎出一之為甚矧可貳乎流言不免乎聞止之以知詎可窮乎 姚氏舜牧曰委是出入之恣淹是浸灌之深

存疑鄭氏康成曰搏猛引重不量勇力堪之與否當

之則往也

孔疏搜搏引勇喻艱難之事不豫度量而往此實暴虎之事而得為儒者如孔子夾

谷之會却築兵斬侏儒也

雖有負者後不悔也所未見者亦不豫

備平行自若也 晏氏光曰搏驚蟲引重鼎者人皆

以為勇力吾不與之程計 胡氏銓曰彼雖有勇力

然不敢與儒者程量 呂氏大臨曰往者不悔幾於

所過者化來者不豫幾於所存者神流言不極不倡

游言也不斷其威將至於儼然可畏不習其謀將至

於不思而得 張子曰流言不極不更深思極慮也
案鷙蟲二句喻其進道之勇重鼎二句喻其任道之
力往者不悔不以前之不合而以道徇人來者不豫
不以後之可成而豫為迎合如鄭說則上四句為北
宮黝之必勝次二句為孟施舍之無懼矣諸說都認
定在勇力上滯矣過言不再兩言字似一例疑過言
是當面數責我流言是暗布讒沮我不再不極所謂
止謗莫若自脩我增脩其德而彼言自止也

儒有可親而不可劫也可近而不可迫也可殺而不可辱也其居處不淫其飲食不溽其過失可微辨而不可面數也其剛毅有如此者

數所具反

正義鄭氏康成曰淫謂傾邪也恣滋味為溽溽之言欲也孔氏穎達曰儒者性既剛毅故居處不傾邪飲食常質不濃厚也呂氏大臨曰儒者之立立於義理而已以義交者雖疏遠必親非義加之雖強禦不畏故有可親可近可殺之理而不可劫迫辱也淫

侈溢也溥濃厚也侈其居處厚其飲食欲勝之也欲勝則義不得立不淫不溥所以立義也 方氏慤曰德雖可親而不可劫之以力迹雖可近而不可迫之以勢身雖可殺而不可辱之以威不以四支之安而過其行不以口腹之養而污其身微辨者諷諭之面數者指斥之凡此皆體剛而用毅也淫於居處溥於飲食皆人之慾也孔子曰棖也慾焉得剛

存疑呂氏大臨曰其過失可微辨而不可面數一句

乃尚氣好勝之言於義理未合成湯改過不吝子路
聞過則喜推是心也苟有過失雖怨詈且將受之況
面數乎 姚氏舜牧曰彼以美情來若將親我者然
而其意實主於劫彼以好禮來若將近我者然而其
意實主於迫唯儒者堅持道義而潛燭其情於親近
之中故彼雖以親我近我來我但自守不因而與親
與近何至受其劫與迫如孔子之處陽貨者是也

儒有忠信以為甲冑禮義以為干櫓戴仁而行抱義而

處雖有暴政不更其所其自立有如此者

處上聲更平聲自立家語

作自守

正義鄭氏康成曰甲鎧也冑兜鍪也干櫓小楯大楯也孔氏穎達曰甲冑干櫓所以禦患難儒者之忠信禮義亦以禦患難謂有忠信禮義則人不敢侵侮也戴仁而行仁之盛抱義而處義不離身雖有暴政不改其志操迥然自成立也呂氏大臨曰忠信則不欺不欺者人亦莫之欺也有禮者敬人敬人者人

亦莫之侮也忠信禮義所以禦人之欺侮猶甲冑干櫓可以捍患也行則尊仁居則守義所以自信也篤雖暴政加之有所不變也自立之至者也 葉氏夢得曰甲冑者自防之器忠有諸中信有諸己亦以自防也干櫓敵人之器禮以區別義以裁制亦所以敵人也仁為天下之表故戴而行義為天下之制故抱而處暴政者時也不更其所守者己也已之自立者乃所以應時 晏氏光曰仁主於愛常患乎暱而不

尊戴仁者所以尊之義主於斷常患乎嚴而不親抱義者所以親之

通論孔氏穎達曰初言自立謂強學力行而自脩此言自立謂獨懷仁義忠信 呂氏大臨曰首章言自立論其所學所行足以待天下之用而不窮此章言自立論其所信所守足以更天下之變而不易二者皆自立也有本末先後之差焉 馬氏曰待聘至待取亦言自立何也所待者在人所以待者在己故言

自立而此防身遠害之道亦自立也 胡氏銓曰前言忠信以為寶立義以為土地乃平居時此言忠信以為甲冑禮義以為干櫓則行乎患難時

儒有一畝之宮環堵之室簞門圭窬蓬戶甕牖易衣而出并日而食上答之不敢以疑上不答不敢以諂其仕有如此者

堵音覩簞音畢窬音豆又音史甕烏貢反牖音酉

正義鄭氏康成曰言貧窮屈道仕為小官也宮謂牆垣也

項氏安世曰宮以基言室以屋言

環堵面一堵也五版為堵五

堵為雉簞門荆竹織門也

孔疏柴門也

圭窬門旁窬也穿

牆為之如圭矣并日而食二日用一日食也上答之謂君應答而用其言

孔氏穎達曰此明儒者仕宦

能自執其操也徑一步長百步為畝若折而方之則東西南北各十步為宅也牆方六丈故云一畝之宮環謂周迴也東西南北唯一堵蓬戶謂編蓬為戶又以蓬塞門謂之蓬戶甕牖牕圓如甕口又云以敗甕口為牖易衣合家共一衣出則更著之也并日而食

謂不日日得食君應答而用其言已則竭力不敢猜
疑有言而君不用則靜默不敢諂媚求進 呂氏大

臨曰儒者之仕將以事道也然有時乎為貧辭尊居
卑辭富居貧居之至陋養之至不足儒者不悔也上
之禮答不答繫乎知不知雖窮如是上苟知之則必
以是道自期不疑乎上之未信而有所屈蓋事道不
為貧也上苟不知則我之以力事人求其食以免死
而已若君不問而自告其謀枉尋直尺強聒而不舍

人謂之不諂不信也蓋為貧者非事道也二者儒者
仕之大分不可亂也 方氏慤曰不敢以疑者自信
之篤不敢以諂者懷忠之深 陳氏澂曰道合則就
即信之而不疑無患失之心也不合則去即安之而
不諂無患得之心也

儒有今人與居古人與稽今世行之後世以為稽適弗
逢世上弗援下弗推諂諂之民有比黨而危之者身可
危也而志不可奪也雖危起居竟信其志猶將不忘百

姓之病也其憂思有如此者

稽古奚反稽苦駭反讒仕咸反比毗志反信依注讀

伸

正義鄭氏康成曰稽猶合也古人與合則不合於今人也援猶引也取也推猶進也舉也危欲毀害之也起居猶舉事動作信讀如屈伸之伸孔氏穎達曰此明儒者雖身不居明代猶能憂思愛及於人之事也楷法式也上弗援不為上所引取也下弗推不為下所薦舉也雖比黨之民共危之而行事舉動終能

伸己之志謀不變易也 呂氏大臨曰人有知不知
吾所恃者尚論古之人而有合也時有遇不遇吾所
守者不喪乎本心也志有行不行吾所存者不敢忘
天下也三者義理之所在至於窮不悔達不變自信
之篤者也 方氏慤曰與今人並行於世與古人稽
合於道也今世行之後世以為稽者中庸所謂行而
世為天下法是也援則自上而引下推則自下而進
上私相與而為比暗相結而為黨雖危起居以其身

可危也竟信其志以其志不可奪不忘百姓之病者
孟子所謂天下有饑溺猶己饑溺之也 葉氏夢得
曰適弗逢世天也比黨危之者人也起居雖危而竟
信其志天與人莫之奪也

存疑鄭氏康成曰猶圖也

孔疏其所圖謀不
忘百姓之憂病

儒有博學而不窮篤行而不倦幽居而不淫上通而不
困禮之以和為貴忠信之美優游之法慕賢而容衆毀
方而瓦合其寬裕有如此者

行下孟反上時掌反
家語無幽居二句

正義鄭氏康成曰不窮不止也幽居謂獨處時也上通謂仕道達於君也既仕則不困於道德不足也忠信之美美忠信者也優游之法法和柔者也毀方而

瓦合去己之大圭角

孔疏方謂物之方正有圭角鋒銳也

下與衆人小

合也

孔疏瓦合瓦器破而相合言儒者毀屈己之方正下同凡衆如破去圭角與瓦器相合

必

瓦合者亦君子為道不遠人 孔氏穎達曰不淫雖

復隱處常自脩整不傾邪也不困謂身通達於君既在其位必行其政使德位相稱不為困蔽也禮以體

別為理人用之常患於貴賤有隔尊卑不親儒者用之則貴賤有禮而無間隔故云以和為貴見人忠信則美之見人和柔則法之見賢思齊是慕賢也汎愛一切是容衆也 葉氏夢得曰博學有以貫之故不窮篤行有以至之故不倦幽居而能樂天故不淫上通而能知命故不困忠信之美充實於內優游之法遜接於外充實於內故尊賢而慕之優游於外故愛衆而容之慕賢則能毀方而為圓也容衆則能瓦合

而為同也 陳氏澂曰博學不窮溫故知新之益也
篤行不倦賢人可久之德也幽居不淫窮不失義也
上通不困達不離道也禮之體嚴而用貴於和忠信
禮之質也故以忠信為美優游用之和也故以優游
為法賢雖在所當慕衆亦不可不容汎愛衆而親仁
亦是意也 徐氏師曾曰博學二句以脩己言幽居
二句以處世言禮之以和三句以立體言慕賢二句
以待人言此儒者寬大長裕之行也

案忠信優游鄭孔以待人言葉陳徐三家以己身言
然必已有之而後能美人之美法人之法其說蓋相
備也

儒有內稱不辟親外舉不辟怨程功積事推賢而進達
之不望其報君得其志苟利國家不求富貴其舉賢援
能有如此者

辟同避家語程功積事下有不求厚
祿句君得其志下有民賴其德句

正義鄭氏康成曰君得其志者君所欲為賢臣成之
孔氏穎達曰稱舉也不辟親若祁奚舉其子午不

辟怨若祁奚舉其讐解狐儒者欲舉人必程効其功
積累其事知其賢乃推而進達之不求望其報也輔
助其君使君得其志意所欲此推賢達士惟苟在利
益國家不自求富貴也 方氏慤曰不以一身之小
嫌妨天下之真才故雖親也亦在所稱不以一心之
私忿害天下之公義故雖怨也亦在所舉 徐氏師
曾曰唯程算其平日之功積累其平日之善推以爲
賢而進達之於上也又能下不望報於所舉之人而

忘其德我上不求利於所事之君而但欲利國夫舉
賢援能始終一於至公如此非區區薦人者所可及
也

儒有聞善以相告也見善以相示也爵位相先也患難
相死也久相待也遠相致也其任舉有如此者

難乃旦
反家語

無此
節

正義鄭氏康成曰相先猶相讓也久相待謂其友久
在下位不升己則待之乃進也遠相致者謂己得明

君而仕友在小國不得志則相致遠也 孔氏穎達

曰此明儒者任舉同類前經謂疏遠者此經謂親近者遠相致遠相招致也 呂氏大臨曰此任舉朋友

加重於天下之士者義有厚薄故也 徐氏師曾曰

聞善相告見善相示欲其進德脩業以為任舉之地居常有爵位相先之義處變有患難相死之心以堅任舉之節

儒有澡身而浴德陳言而伏靜而正之上弗知也麤而

翹之又不急為也不臨深而為高不加少而為多世治不輕世亂不沮同弗與異弗非也其特立獨行有如此

者

澡音早麤七奴反
行下孟反又如字

正義鄭氏康成曰不臨深而為高臨衆不以己位尊
自振貴也不加少而為多謀事不以己少勝自矜大
也世治不輕不以賢者並衆不自重愛也世亂不沮
不以道衰廢壞已志也 孔氏穎達曰澡潔其身不
染濁也沐浴於德以自清也位雖同而行不善則不

與親合彼雖與己疏異所為是善則不非毀之身所
特立獨有此行故曰特立獨行 呂氏大臨曰唯大
人為能格君心之非然在己者未正未有能正人者
也故澡身浴德者所以正己也陳言而伏者入告嘉
謨嘉猷于內爾乃順之于外也 方氏懋曰靜而正
之者隱進之也麤而翹之者明告之也與其所可與
不必同乎己非其所可非不必異乎己若同而與之
則讒諂面諛之人至矣異而非之則直諒多聞之友

去矣 葉氏夢得曰雖能其事不臨深而為高惡自
高也雖有其功不加少而為多惡自大也世治而士
貴矣其行不輕世亂而士賤矣其志不沮 馬氏晞

孟曰自立者對人言之特立者對衆言之 姚氏舜

牧曰靜而正所謂唯大人格君心之非也故上弗知
麤而翹所謂務引其君於當道者故又不急為恥自
高烏用臨深不貴多安事加少世治可進而或自輕
焉其誰重之世亂可退而或自沮焉其誰與易人皆

附同然其中有不可苟合者弗與也人皆惡異然其
中有未可輕訾者弗非也是皆非俗儒所能也 晏
氏光曰世治則人皆務進而求利吾則未嘗妄動故
曰不輕世亂則人皆自屈以辟害吾則未嘗變節故
曰不沮 應氏鏞曰非但處而特立於一身亦出而
獨行於一世

通論徐氏師曾曰前言特立自守之義居多此加獨
行達道之義居多

存疑呂氏大臨曰麤而翹之者其事君也以其事之
麤者微發其端而為之兆兆足以行則進而無已不
足以行則去之孔子所以未嘗終三年淹故曰不急
為也所以事其君者先其未發而止其為惡先為之
兆以嘗其為善此衆人所未識也

案此說近理但一句作兩截講亦未

安

葉氏夢得曰同於己者或鄉愿也公而弗與異
於己者或行怪也惡而弗非 徐氏師曾曰世治則
德常見重而人不我輕世亂則德周於身而邪不能

沮也

案此以不輕不沮屬人不如晏說

存異鄭氏康成曰麤猶疏也微也君不知已有善言正行則觀色緣事而微翹發其意使知之又必舒而脫脫焉已為之疾則君納之速君納之速怪妒所由生

也

孔疏上不知我當伺候君上顏色因緣有事微疏而起發之使上得知又不可急速

儒有上不臣天子下不事諸侯慎靜而尚寬強毅以與人博學以知服近文章砥厲廉隅雖分國如錙銖不臣不仕其規為有如此者

近去聲錙側其反家語砥厲廉隅句在強毅上

正義鄭氏康成曰強毅以與人不苟屈以順之也君

分國以祿之視之輕如錙銖矣八兩曰鎰

孔疏案算法十黍為

銖十黍為銖二十四銖為兩八兩為鎰

孔氏穎達曰此明儒者志操

規為之事上不臣天子伯夷叔齊是也下不事諸侯
長沮桀溺是也既慎而靜所尚寬緩也不與人為臣
不求仕宦但自規度所為之事而行故曰其規為如
此 呂氏大臨曰慎靜而尚寬有度也強毅以與人
有守也砥厲廉隅有節也是則所以事道者無歉也

非其義也非其道也祿之以天下弗顧也故雖分國而授之視之如錙銖之輕 晏氏光曰上不臣天子下不事諸侯者易所謂不事王侯高尚其志也慎靜而寬者以仁而盡性強毅以與人者以義而制事博學以知服者以知而窮理近文章者外有備成之文砥厲廉隅者內有脩潔之行

存疑鄭氏康成曰博學以知服不用己之知勝於先

世賢知之所言也

孔疏廣博學問猶知服畏先代賢人不足以已之博學凌夸前賢也

孔氏穎達曰近習文章以自砥厲成己廉隅 呂氏大臨曰不臣者不傳贄為臣周之則受賜之則不受也博學以知則有本也服近文章則有文也 陳氏澠曰知服知力行之要也博學知服即博文約禮之謂

案慎靜者戒慎操持尚寬者包含廣大此所規所為之大略也意量寬廣而又強毅以與人操持慎靜而又博學以知服服事也謂知所當行之事博學則能

文章而文章乃近之強毅則有廉隅而廉隅又砥厲
此所規所為之密行也分國授我視如錙銖非湯武
之君不出也

儒有合志同方營道同術並立則樂相下不厭久不相
見聞流言不信其行本方立義同而進不同而退其交

友有如此者

樂音洛下行並去聲家語無其行本方立五字

正義鄭氏康成曰同方同術等志行也聞流言不信

不信其友所行如毀謗也

吳氏澄曰韓文其行屬上句謂雖流言毀其行而已

不以其行為信也孔疏庾氏云其行所本必方正所立必存義則以其行屬下句

孔氏穎

達曰此明儒者與人交友之事方猶法也言儒者與友合齊志意而同於法則也經營道藝同齊於術同術則同方也但合志同方據所懷志意營道同術據所習道藝也雖朋友久不相見聞流謗之言而已不信也其行所本必方正所立必存義朋友所為與己同則進而從之不與己同則退而避之 呂氏大臨曰君子之道或出或處或默或語凡所謂同者理也

義也出於人心之所同然賢者能存而勿喪之故不
患乎不同也合志同方則志同好矣營道同術則學
同道矣並立則樂相下不厭好同則同體矣久不相
見聞流言不信學同則信其行矣行同則學同進退
同則好同交友之分至於無一不同者學一於理而
不惑也方氏慤曰並立則樂以其無忌心相下不
厭以其有孫志久不相見聞流言不信以其久要不
忘而相信之篤馬氏曰方者道之所也志在於道

唯合志故同方術者所資以適道唯營道故同術

晏氏光曰方言趨向之地術言脩為之業論語曰士志於道是志必在於道道不外於志也故始焉合志而趨向者不殊終焉營道而脩為者一致有朋自遠方來不亦樂乎故並立則樂以能問於不能以多問於寡故相下不厭同方同術者講習之友並立相下者相成之友不信流言同而進者同德之友故曰其交友如此 吳氏澄曰義所以方外以方為本而立

其義朋友以義合者也

存疑孔氏穎達曰並立則樂者謂與友同仕則樂相
下不厭者遞相卑下不厭賤也 陳氏澣曰並立爵
位相等也相下以尊位相讓而已處其下也

案並立相下都在志道上說孔陳以爵位言淺矣

總論孔氏穎達曰自此以上凡十五儒所陳之事亦
有前後垂異者此上經云不臣不仕而第一儒云席
上之珍以待聘夙夜強學以待問懷忠信以待舉力

行以待取則有仕宦之志也第十儒云寬裕第六儒
曰剛毅與寬裕亦別也第三儒云愛其死養其身備
豫禍患而第五儒云劫之以衆沮之以兵見死不更
其守亦不同也所以如此不同者儒色百行事非一
揆量事制宜隨機而發當其剛毅之節則守死不移
論其營養之道則寬而容衆逢有道之世則進而事
君遇無道之時則退而不仕且賢有優劣儒有大小
大儒則理色百行小儒則偏守一邊所以尚書皋陶

九德德多則為天子諸侯德少則為大夫卿士苟達於此儒行亦然雖或不同無所怪也

溫良者仁之本也敬慎者仁之地也寬裕者仁之作也
孫接者仁之能也禮節者仁之貌也言談者仁之文也
歌樂者仁之和也分散者仁之施也儒者兼此而有之
猶且不敢言仁也其尊讓有如此者

孫與遜同施去聲
案儒者今文作儒

皆

正義鄭氏康成曰此兼上十有五儒蓋聖人之儒行

也孔子嫌若斥己假仁以為說仁聖之次也 孔氏
穎達曰此明聖人之儒兼上十五儒之行仁者之儒
先從溫良而起故云仁之本以敬慎為地地所以居
止萬物儒者之動作必以寬裕孫辭接物是仁儒之
技能禮儀搏節是仁儒之外貌言語談說是仁儒之
文章歌舞喜樂是仁儒之和悅散蓄積而賑貧窮是
仁儒之恩施也儒者既兼有此行猶不敢自謂己任
其尊敬於物卑讓於人有此行也此謂聖人之儒但

聖人理極不可為名仁亞於聖故假仁言之 呂氏
大臨曰質之溫良者可與為仁故曰本行之敬慎者
可與行仁故曰地其規模寬裕則稱仁之動作其與
人遜接則習仁之能事威儀中節敬於仁者也故為
貌出言有章仁之見於外者也故為文詠歌之不足
不知手之舞之足之蹈之安於仁而至於和者也貨
不為己則利與人同與人為善則善與人同凡以分
散與物共而不私則仁術之施不吝也八者儒必兼

而有之然後可以盡儒行之實猶且不敢言仁則聖人之志存焉有聖人之志存則可與入聖人之域矣

方氏慤曰仁無本不立故首以仁之本有本然後可行故繼以仁之地有行則有所事故繼以仁之作有作則見其所能故繼以仁之能有所能則形之於外故繼以仁之貌形於貌則必有所飾故繼以仁之文有其文則無乖於物故繼以仁之和有所和則其餘足以利物故繼以仁之施

通論陳氏祥道曰儒行十五而以仁與禮樂終焉則成人之道盡於此矣孔子未嘗與門人以仁與禮樂所與特顏子一人而已然則顏子之去聖人其出入亦不遠矣合之則禮樂皆本於仁離之則仁近於樂義近於禮孔子以孝悌為仁之本孟子以事親為仁之實從兄為義之實其致一也

儒有不隕穫於貧賤不充詘於富貴不恩君王不累長上不閔有司故曰儒今衆人之命儒也妄常以儒相詬

病孔子至舍哀公館之聞此言也言加信行加義終沒

吾世不敢以儒為戲

隕于敏反穫戶郭反詘求勿反恩胡困反長丁丈反詒呼候反行去

聲家語行加
義下有曰字

正義鄭氏康成曰隕穫困迫失志之貌也充詘歡喜

失節之貌恩猶辱也累猶繫也

孔疏案孔子世家在魯哀公不用在齊犁

鉏所毀入楚子西所譖適晉趙鞅欲害伐樹於宋削跡於衛畏於匡厄於陳蔡被辱累多矣

閔病


也言不為天子諸侯卿大夫羣吏所困迫而違道孔子自謂也妄之言無也言今世名儒無有常人遭人

名為儒而以儒靳故相戲此哀公輕儒之所由也詬
病猶恥辱也儒行之作蓋孔子自衛初反魯時也孔
子歸至其舍哀公進而禮館之 呂氏大臨曰小人
之儒也為人君子之儒也為己小人之儒也以文君
子之儒也以實以文對實以為人對為己則小人觀
美而近名君子闇然而難知且將以遠大為迂闊以
高明為無實以遠勢利為詐以守禮義為簡指白為
墨誣善為惡此所以以儒相詬病也如識乎君子之

儒者且將矜式之不暇又何敢戲乎 方氏慤曰無
儒者之行而為儒者之服無儒者之實而盜儒者之
名故曰今衆人之名儒也妄以其妄故常為人相詬
以言相病以行也言加信則不以儒相詬矣行加義
則不以儒相病矣

存疑鄭氏康成曰充或為統閔或為文 吳氏澄曰
妄常猶曰妄庸言今世衆人不識凡名之為儒者皆
妄人常人耳故為人所輕賤苟名之曰儒是以此名

詒病之也



欽定禮記義疏卷七十二